

# **RIKI RIKKOT SERIKKOT**



**(Late) Meckenson Rongmutu Sangma  
Tura**



DEDICATED  
TO  
MY DEAR FATHER  
**(LATE) MECKENSON RONGMUTU SANGMA**

AND  
MY FAMILY MEMBERS

AND  
HIS CONTRIBUTION FOR THE GROWTH AND  
DEVELOPMENT OF GARO LITERATURE

**1998**

**SALSENG C. MARAK, MLA.**  
**Publisher.**

**Published by :- Shri Salseng C. Marak, MLA**  
Village : Gajingpara,  
P.O. Mendipathar,  
East Garo Hills (Meghalaya)

**First Edition : 1998.**

**1000 Copies**

**Price : Rs. 25/-**

**) – By the Publisher**

**Distributor : Ms. R.C. Marak**  
Lower Motinagar  
Shillong- 793 014  
Phone : 220436, 222817

---

***Printed at : Singhania Offset Press, Thana Road, Shillong- I***

## CHAPPA KA'ATGIPANI AGANDAPANI.

Angni pagipa Pa Meckenson Rongmutu Sangma, A'chikni sea jotanirangna gisik nanggipa saksa ong'a. Ua antangni janggi tangani salrango bang'a kirtaprangko seaha-jekai 'Sin'karini katta aro uandakgiparang. Ua adita poetryrangkoba see donangaha jemangoni iarang ong'a- (1) Song Baghmara (2)-Panteni gisik ra'ani (3) Randi Me'chikni sintea (4) Pante bilsi chichet (5) Matchani sima nia aro gipinrang. Unbaksana, ua mitam English kur'sikonikoba pe'skae see donangaha-jekai - (1)- Merchant of Venice (2) Mama Tomni jamdap. Uandake ua antangni chasongo, jatni sea jotanirangna gisik nange see donangkiparangoni mingsa ia daro chappa ka'atenggipa 'Riki Rikot Serikkot' ong'a.

Pa Meckenson Rongmutu Sangma, ia seanirangko me'apa chagitchamrangoniko wal'tim golpoarango knatimrike, sara nokkra rogrikao golpoarangko knarike, me'apa skarangni golpoarangko aro agan ku'ritingrangoniko knarikna man'e, knalo chasong gitalrangba ma'sirikpachina ine se donangaha. Uni uandake gisik nange knatimrike seani gitan kirtapni bimungkoba 'Riki Rikot Serikot' ine mingaha.

Anga ia angni pagipa sagini kirtapko chappa ka'na dakchakgipa plak ripengrangkon mitela.

Anga ia seaniko press-o chappa ka'mittingo salrango gualanirangko nipilna dakchakanina Dr. Julius L.R. Marakko mitela.

Ia kirtapko chappa ka'na antangni press-o kamrang jakchakjaoba dakchakanina M/S Singhanian Offset Press, Shillong, dingtangmancha mitela.

Ia kirtapko poraie nigipa sakantian maiba namgniko ba skidapaniko man'gen ine anga ka'donga. Ia chappa ka'anio anga darangkoba miksonga dongja, indiba jekon Apa angna ia gamko donangaha ukosa A'chik jatni sea jotanirangko bariatna chappa ka'atenga. Seanio maiba gualanirang dongode angna see uiatpachina ia kirtapko poraisoenggipa sakantiko mol'molata jedakode anga uarangko changgipin chappa ka'ataianio namdapataniirangko dongode on'dapatna man'gen.

## AGANDAPANI.

(Late) Pa Meckenson Rongmutu, Pa Salseng C. Marak, MLA-m pagipa, A'chik jatni sea jotanirangna gisik nangbegipa saksa ong'a. Ua an'tangni u'i ma'sianirangko an'tang baksa bon'atanggija, jatna, a'songna namgni ong'gniko nike aro jatni sea jotanirangko bariatna miksonge see donangaha.

A'chik pagitcham, ma'gitchamrangni gisepo songo noko ba a'songtango donge, songsul roe noksul cha'e, sara nokkra rogrike, wal'tim asong golpoe, ku'mong meligrike dongode, rokomari me'apa chagitchamrangni golpoarangko, agan ku'ritinganirangko knarikna man'a. Uamangni agan golpoanirang mitamrangde golposan ong'ja, chong'mot ong'a obostarangkoba gisik nangrikgipa chadamberangna aganange on'ronga.

Meckenson Rongmitu, sakantini wal'tim golpoarangko, agan ku'rittingrangko gisik nang'be'e knatinrike ia namnambegipa chong'mot ong'a a'selrang jerangan jatni gisepo ong.angahachim, uarangko A'chik jatna see donangaha. Ia mingantini katta bichongrangko poraic nigenchim ong'ode ma'sirikna man'gen. Ua an'tangni sakantini dingtangdingtang agananirangko serikote aro sandirikote serikani kri bimungkoba, 'Riki Rikot Serikot' ine donaha, maina ua sakantini aganrikotanirangko serikote ra'rikaha.

An'tangni pagipa Mckenson Rongmitu Sangmani donanga gamko galchipe donaigija, Pa Salseng C. Marak, MLA, jean jatni sea jotanina gisik nangbegipa ong'achim, dongrikenggipa A'chik chadamberang u'i ma'sirikpachina, jekon pagipa see donangaha, uko galchipe donaigija chappa ka'e parakataha. Pa Salseng C. Marak, MLA aro Meghalaya State-ni Chief Minister ong'e, a'songko sason ka'engon kamrang jakchakjagenchim ong'oba, jatni sea jotanirangna gisik nanggipa ong'e, uarangko bariatna gualjaha. Uandake, pa Salseng C. Marak, MLA an'tangni pajongtang (Late) Dewansing Rongmutu Sangmani see donanggipa ki'tap kinggni-Jadoreng (1993) aro The Traditional Dances of the Garos (1996) - rangkoba sandirikite jatna chappa ka'e on'aha.

Uni uandake jatke a'songko silroro churoroatna jako ra'e sason ka'asan ong.aigija, leka poraianio, sea jotanio gisik nange bariatna miksonganirang gipinrangnaba didiatanirang ong'china.

Anga, Pa Salseng C. Marak, MLA-ko ia agandapaniko sena cholko on'anina dingtangmacha mitela.

*Dated Shillong,  
12th January, 1998*

**Julius L.R. Marak**

Sl. No.	CONTENTS	Page.
1.	Bikpil Bawil seoba apsangipa katta warjol	1
2.	A-oni Z-ona Roman oikor dongtokgipa katta warjol	1
3.	Joljol poraio orto dingtang, ritingprak watchange poraio orto dingtang dakgipa	2
4.	Maikai changsao koma mande saksani janggiko jokata	3
5.	Ukilm kattan kolgipu gita mande saksani janggiko jokata	4
6.	Matcha balangginoni	5
7.	Matcham Nachilo pare	6
8.	Biade antang dedrangko A Oikorchu a'bachenge mingtoka	8
9.	Dedrangko A oikoroni sulsul a'bachenge mingskaa	9
10.	Chin mandeba English mandemingde sokchakgrikaia	9
11.	Na'a Ang' gre enia Nang' greni orto	10
12.	Me'mang chrokata	11
13.	Apsan mandekon singnioniko changgnina jokata	12
14.	Uamang Mongma buring manggniko tata dinga	14
15.	Matbilko sui'tekteke wata	16
16.	Matdi Gitokrengo	17
18.	Sokmil biterang okningoni okningona	19
19.	U'iani biginchi Sastro Niam Gitchamnoni	20
20.	A'chikni aganani gitan- Dawan' De	21
21.	Oksambengo Ki'sangkol donggipa mande	23
22.	Torommi ong'batsranggipa mande sakgitam	24
23.	Simano atchitaia	24-28
24.	Matcha pil'gipa mandeni Nokdango	28
25.	Kristoni a'sel janggitangko on'gipa	29-35

26. Dorbretha Aganna	35
27. Me'mangni gro chota	36-40
28. Ong'ronggija ong'an	40
29. Joe Louis	41
30. Me'mang Chroka	42
31. Changsao dakgrikram a'bao Christmas salo	44-47
32. Turani me.apa sakgni Matcha tima	47-49
33. Aiao inmanpil'e ong'tinggrika	49
34. Matgitchaka maina da'ona kingking hopenga	50
35. Aping palsrukgipa	51-54
36. Chin A'songni dal'begipa Guare	54-58
37. Noani Ring dongengpiti da'onaba	58-61
38. Songni Nokpante	61-63



**Serikkot Ming 1:**

**BIKPIL BAWIL SEOBA APSANGIPA KATTA WA'JOL**

*Chumonggipa : M Rongmuthu*

Napoleon an'tangni janggi tangao Europe gimikko chotchanggihia dagrikachi so'sojengjeng ong'atbeaha. Changsaode biko French manderangan Mediterranean sagalo donggipa chongipa chichang ELBA minggipaona din-galaha. Ua Elba chichango sal 100 dongmitingo Napoleon ka'mao mesokgipa katta wa'jolko aganaha ina. Ia katta wa'jola chusokgipa katta wa'jol ong'a. Ia katta wa'jolni ong'ronggija ong'aniaian: Porabewal jakasichini jakrachini poraio jedake ong'a uandaken jakrachini jakasichina poraioaba apsan ong'a. Da'o nibo,

ABLE WAS I ERE I SAW ELBA.

☆☆☆☆☆☆☆☆

**Serikkot Ming 2:**

**A-ONI Z-ONA ROMAN OIKOR DONGTOKGIPA  
KATTA WA'JOL.**

*Chumonggipa : M. Rongmuthu*

Ka'mao Mesokgipa katta wa'jol kandikgipa katta wa'jolsa ong'a Indiba na'a uano Roman oikor A-oni Z-ona dongtokako nikgen. Da'o nibo enia oikorkoba A-oni Z-ona am'e nibo:

A QUICK BROWN FOX JUMPS OVER THE LAZY DOG.

Ia katta wa'jolo oikor A-oni Z-ona dongtokani gimin uko type dokako skiao on'ronga

☆☆☆☆☆☆☆☆

**Serikkot Ming 3:**

**JOLJOL PORAIO ORTO DINGTANG, RITTINGPRAK  
WATCHANGE PORAIO ORTO DINGTANG DAKGIPA  
KATTA WA'JOLRANG.**

*Chimonggipa : M. Rongmuthu*

Ka'mao mesokgipa katta wa'jolrangko na'a poraibewal gita joljol poraiode orto gimikan jechakani ku'wa'jolrang ong'a. Indiba ritingprakprak watchang watchange poraiode kurachakani kattarang ong'a.

My dear,

The great love I have hitherto expressed for you is false and I find my indifference towards you increases daily. The more I see of you the more you appear in my eyes an object of contempt. I feel myself every way disposed and determined to hate you. Believe me I never had an intention to offer you my hand. Our last conversation has left a tidious insipience which has by no means given me the most exalted idea of your character;

Your temper would make me extremely unhappy, and if we are united, I shall experience nothing but the hatred of my parents, added to everlasting displeasure in living with you. I have, indeed, a heart to bestow, but I donot desire you to imagine it at your service. I could not give it to anyone more inconsistent and capricious than yourself and not capable to do honour to my choice and to my family.

Yes, indeed, I hope you will be persuaded that I speak sincerely, and will do me a favour to avoid me. I shall excuse your taking the trouble to answer this. Your letters are always full of impertinence and you have not a shadow of good sense of wit. Adieu. Adieu. Believe me. My advice to you is that it is impossible for me, to be your most affectionate friend and humble servant.

☆☆☆☆☆☆☆☆

#### Serikkot Ming 4:

### **MAIKAE CHANGSAO KOMA (,) MANDE SAKSANI JANGGIKO JOKATAHA.**

*Chimonggipa : M. Rongmuthu*

Skanggipa A'gilsak gimikni Dal'gipa Dakgrikanina skang Russia gimikko rajachi sason ka'achim. Russiani rajani upadiko Czar ba Tsar (Jar ine gam'atbo) mingachim. Czar Russia a'song gimikko skatang sason ka'achim. (Da'ororo Russiako UNION OF SOVIET SOCIALIST REPUBLIC ine minga. Kandike USSR ine sea.)

Uororo chasongo saoba dal'bea dosko dakao rim'ako man'e bichal ka'ako man'e, siaona galonako man'na nangode ua mandeko, India British chasongo mande dengiparangko pasi on'a ba Andaman chichangchi watata gita, Russian Sorkariba pasio ga'akgipa manderangko mandegrigipa suriarigipa Siberia a'songechina watatrongachim.

Changsao mande saksma maiba dalbea dosko dakana rim'ako man'e, uko Hakim bichal ka'on, uni kosako Hakim indake rae on'aha: PARDON IMPOSSIBLE, TO BE SENT TO SIBERIA. Iani ortoa indake ong'a: Kema ka'na man'jachongmot, Siberiachi watatna nanga. Pilak Hakimni bichalo rae on'anirangko Raja Dal'gipa Czar-ni soiko man'manosa chu'sokatna man'achim.

Ia hakimni raeko Czar-ni chango (tebilo) soi ka'china doneaha. Unomiting gamu rim'ram dringo Czar dongjachim. Czar-ni jikgipa maibakae Czar-ni gamu rimram dringchina re'bagake chango donegipa hakimni raeko nike poraioa, mande saksani janggide siani ong'jok ine nikaha. Unigimin Czar-ni jikgipa Czarina ua siao galonako man'gipa mandena ka'sachake, "IMPOSSIBLE" kattani ja'mano ong'gipa Koma (,) -ko ka'sne kimitgale, uko "PARDON" kattani ja'mano ua Komako donatskaha. Indake komako jujae donatoa Hakimni raede indake ongskaaha: PARDON, IMPOSSIBLE TO BE SENT TO SIBERIA. Iani ortoa indake ong'a: Kema ka'a, Siberiachi watatna man'jachongmot. Raja Dal'gipade Hakimni bichal ka'a gimikko poraigija ia raeko nikari soi ka'ataijok.

Indake koma (,) mingsamangmangchiba kattani ja'man totani kri mandeni janggiko siatani ba tangatani ong'a.

☆☆☆☆☆☆☆☆

## Serikkot Ming 5:

### UKILNI KATTAN' KOLGIPUGITA MANDE SAKSANI JANGGIKO JOKATA

*Chimonggipa : M. Rongmuthu*


India Britishni chasongo Bengalo saksanungsinggipa ukil Rash Behari Ghose minggipa dongachim. Ua namen changbegipa ukil ong'achim. Gro namen namjabearangonikoba ua ukil biko ragipa manderangko antangni jera rana changachi dos ong'aonirangkoba naljokatna man'rongachim.

Changsao segri saksani depante maiba dala dosko dake, pasi on'na nangao ga'akako man'aha. Ia segri Rash Behari Ghosedede jegita gro dal'aonikomangba mandeko jokatna man'a ine uie bini nokchi re'ange bini depanteke pasi on'gnioniko jokatpachina mol'molaha. Ua ukil chu ringsobeengachim. Chu mikmaka ka'chi ua segrina indine aganataha, "Atcha, anga nang depanteke knalao jokatgen."

Salgipin pringo ua ukil ku'rachakatango chu'sokatna jelkanachi pasi on'ram biapona re'angaha. Pasi on'ani somoi ong'jok. Rae on'atango chu'sokatna bichalka'gipa Hakimba re'bajok. Ua panteko mikkang katipe, jak'o jakko be'en gimik buduchi kae pasi on'ram biapo chadengate dingdegipa pagako gitoko patjok. Pasi on'ani pilakan tiktak ong'jok ine nikahaon simalako tip ine rippitatjok. Unon ua panteni janggiko bakan jokatna gisik seng'e dongenggipa ukil Rash Behari Ghose rang'san chabae ua panteni bimangko gipake de'dojok. Iako nikon ua Hakim enia Jel Daroga enia gipin gipin ua pasi on'ao dongpagipa pilakan aiao inmantokjok. Indake ua panteni janggiko ua ukil segrina ku'rachakatango chu'sokatjok. Niam grooni jokkuja. Hakimni raeko chusokatao ua ukil maina pengpangna nanga ine ua ukilko ua salon bichal ka'jok.

Bichalo ua panteni kosako rae on'ako name nioara, "TO BE HANGED" ingipasan. Iani ortoara PASI ON'ANI ONG'A (ba pasi on'na nanga). Ua ukil ua mandeko pasi on'manani nalsaonikosa jokataha; Hakimni raede ua panteko pasi on'ao, simalako rippitataon chu'sokaha. Ua raeko chu'sokatgimin nalsaonikosa uko jokataha ine aganon uko niam gita jena man'jaha.

Indian Penal Code-o (ba Indiani Bichalni Niam-o) ia ukilni ia niamni kolgipuko indake nikadipetsa pasi on'ani bidingo Hakinuni rae pangnan TO BE HANGED TILL DEAD ba sijana kingking pasi on'na nanga ingipa ong'baaha. TILL DEAD ba sijana kingking ingipako ua kitapo on'jotahana.



**Serikkot Ming 6:**

**MATCHA BALANGGIMINONI.**

*Agane on'gipa : Naran M. Marak, Bonepa-Atila, Tura*

Da'o rutbea bilsirang re'angaha, A'chik A'songni salgipeng Magupara songo, changsao A'chik me'tra saksa Nangje minggipa a'bachisaksan a'ba gamna re'angaha.

Attam sal napoba songchina re'bepilako niksojani gimin songni manderang jajreng pilakan sandina ine songo tomdakaha. Songni manderang uko sandina ine sel'u enia milamrangko ra'krime tom'daktokengon Nangjeni mamagipade ka'a dongtojae, sel'uko pakmaoniko srok saloke, songni manderangko sengkrimode, bate bate walrooraignok ine nike saksan a'bachisatsobaaha. Ua mandea ka'donga enia bilakachim.

A'baona sokeon ua a'a gama ba'kuoniko nion matcha ja'-kolrangko nikaha enia a'a gamani gitichi jaktuatangakoba nikaha. Unon ua a'seona kingking ja'kol sandiangaha. A'se sambao chiring dilsa dongachim. Ua chiringko ga'bate on'tisa re'angon a'a a'solsol ja'pao Nangjeko mangglong tuchikipe dongengako nikeaha. Mamagipa an'tang kopingtangko gana pate a'baona ba'tombaaha. Unon songni manderangba gimikan a'baona sokbatokaha. A'selko uina singo'a Nangje mamingkoba ku'sik aganna man'gija be'en gimik dil'dile moe dongaiaha.

Songni manderang uko nokona ra'baaha. Noko uko ba'ra ane tuataha, mirangko du'aha, chirangko kanaha. Ua sal gittam, wal gittamde be'en dildilchae, ku'sik ku'saba aganna man'gija dongaiaha. Be'eno mata parirangko namedake nion maming mata dongja, indiba skoosa wagamni daaparangko nikaha enia be'eno banoba banoba jaksikkilrangni britbrit dakarangko nikaha.

Sal gittam, wal gittamni ja'mano Nangje ku'sik aganna man'baaha enia be'en dildilarangba dongjaha. Ua gisik srangahaon ua indine aganaha: "Angko a'a gammitingo matcha buringchini chabae buringchi balangaha. Ang'skoko du'trome balangarangko anga balangmitingo uianga. Angko matcha a'ding kosako tekara wa'pang chonggnini gisepo adita baanggipa biapo doneaha. Ua biapo angko matcha nitime angni ileng ilengode angko jakchi dokdap dokdape roachim. Menggorangni an'tangtangni chikgimin meserangko cha'na skang kal'grike roa gita angkoba indaken matcha kal'grike roaha. Indaken salgimik matcha angko kal'grike roaha. Ja'mankitiko angko a'dram rikamo tuchikopate donaha. Adita rutani ja'manoba angko matcha dangtapjahani gimin anga ka'sne skoko de'chaoe niwingwango a matchako angni sambik ketchioba, pilakchikoba nikjaha. Unon anga a'dram rikamoni a'ba a'sechina ka'bakchi rongonchrakbajok enia anga a'dram a'solsol ja'pao sikkatejok. Ianon anga be'en gimik tiltilani gimin a'ba china re'bana mangija tuchikipe dongaiaha. Indake dongmitingosa angko mama nikaaha enia angko a'baona ba'e ra'baaha."

Ia mechik ja'mano bilsu ruute, buchumae janggi tangesa siangaha.



### Serikkot Mlng 7:

#### **MATCHANI NACHILO PA'E**

*Agane ongipa : Lahindra N. Sangma, Tura.*

Attam srisrio, sin'srik me'gong balo A'chik a'songni salgipeng Silkigiri song skopong bolma a'chango balgitchak hopengako knae saksa me'apa aganaha, "Rada, wae, re'ange niboda, slai donggipara." Slai donggipa mande rang'san slaiko de'ongkate, sa'rao chakate aganaha, "Hae, sawa angming re'naka?" Unon me'apa saksa atte kongkasi ra'e, "Hae, anga re'na," ine aganaha.

Unomiting chachao salba dapjrip napjok. Indakmiting somoion matcharangba rama dilmarango, baanggipa biaprango miksupeng, jolupeng dake ong'katmiting, do'grik do'mesalarangba bolgrip wa'griprango tuna bilsrumiting; a'brenge a'jrirango attam salniango cha'amna ongkatgipa matchok, balgitchakrangba a'se napsikmiting.

Slai de'e onkgatgipa, atte kongkasi ra'e re'pagipa song skopongchi a'baramako raradoangaha. Bolma a'changona sokna sepangon uamang on'tisa dongdike ka'sne re'angaha. Ia a'baramara ua bolma a'chang gita daksotachim. Bolma a'chang rikamona sokon slai de'gipa atte kongkasi ra'gipa mandena indine aganaha, "Na'a ia biapo dongsobo, anga jom'ange nina." Indine agane uade bolma a'changchi ua a'barama gita balgitchakna jom'angaha. Unon walde andaljok, balgitchak mikoaba jripjok.

Slai ra'e balgitchakko jom'angani adita rutoa bolma a'chang rikamo atte kongkasi ra'bite donangako man'gipa mandeba maidake rutengjok ine bolma a'changchinan ka'sne ga'chokchome re'angaha. On'tisa jasengaoni re'angara bolma a'changode bolgrimanin namen andaljok. Ua ka'sne mamingba gam'atgija ja'a ga'chokchome adita re'angon ua mikkangtango simdimdim protchuchu asonggipara bini ripengan ine chanchie ua on-tisa chadengdikaha. Unon ua bini ripengan balgitchakko gonan asongengakon ine chanchie adita chadengdikani ja'mano ka'sinbee re'ange, sambaona sokon, "GOBODA" ine nachilo pa'e ku'misichi aganaha. Unon maikosa, ua simdimdim protchuchu asonggipara mang badee rang'san rama ka'machi til'menggoangjok. "Aiao! matchasa!" ine jagoke to'troe, jama janggi gale ua chrikaha. Unon chrikako knae bini mikang tongtong adita chel'ao a'barama kosakchi," Maia? Bao? Bachi?" ine slai ra'e balgitchak jom'anggipa ku'rang on'ataha.

"Bakbak re'babo, aiao matcha pangma-jara, angade ino simdimdim asonggipara na'akon inesa nachil pa'e 'GOBODA' ine inpaengjok. Unoara matchasa mang badee tilmenggoe uchi jakasichi rama ka'machi bilsruangjok.'" ine ua rake rake aganataha.

Uni ja'mano uamang bakbakan songona re'bajok. Songo manderangna matchani nachilo pa'e 'GOBODA' ine aganako agane on'oara mitam manderangde ka'dinggagaktokjok, mitamrangara misilchakjok, mitamrangara ansikkitchakjok. Ua matchani nachilo pa'e, 'GOBODA' ine agangipa mandede matchani nachilo pa'e 'GOBODA' ine agano matchani mang badee tilmenggoe rama kamachi bilsruangako chanchiaten chanchiaten un walode walgimik tusina'an man'ajajok.



### **Serikkot Ming 8:**

#### **BIADE AN'TANG DEDRANGKO A OIKORCHI A'BACHENGE MINGTOKA.**

*Agane on'gipa : Amod Sangma, Tura*

A'chik a'songni skotong TURA-o nokdang damsa donga. Ua nokdangni padotni bimingko A okkorchi a'bachenga. Ma'dotni bimingba A okkorchi a'bachenga. Iamangni dedrang gimikkon A okkorchi a'bachenggipa bimingrangchi mingtoka. Da'o nibo:—

Nokdangni padot : AMOD SANGMA

NOKDANGNI ma'dot : ALESORI MOMIN

Dedrangni bimingrang:—

- (1) Anithi Momin, demechik;
- (2) Aporita Momin, Depante;
- (3) Ashrabindra Momin, depante;
- (4) Anpinithi Momin, demechik;
- (5) Ajranath Momin, depante;
- (6) Aiyer Momin, depante;
- (7) Anmilla Momin, demechik.

Iarangna agreba padot enia madotni pagipa ma'giparangni, ambigipa atchugiparangni bimingrangni skanggipa oikorrangde maibakae apsan apsan ongtoka. Da'o nibo:— Amodni pagipako Dingsang Marak; Alesorini pagipako Dandiram Marak minga. Sakgnini bimingan D oikorchi abachenga.

Amodni magipako Gilse Sangma; Alesorini ma'gipako Gilbari Momin minga. Sakgnini bimingan G oikorchi a'bachenga.

Amodni atchugipako Kalsin Sangma; Alesorini atchugipa- ko Kangsiram Marak minga. Sakgnini bimingan K oikorchi a'bachenga.

Amodni ambigipako Dilchi Sangma; Alesorini ambigipako Dilim Momin minge. Sakgnini bimingan D oikorchi abachenga.

★★★★★★



**Serikkot Ming 9:**

**BIARA AN'TANG DEDRANGKO A OIKORONI SULSUL  
A'BACHENGE MINGSKAA.**

*Agangipa- : Bhupendra B. Sangma, Tura*

Turao donggipa nokdang damsani padot Me'apa Bhupendra B. Sangma an'tangni dedrangko Skichenggipa Oikor gita sulsul atchiani kri minga. Da'o nibo:-

A oikorchi a'bachenge	:	Atkinson Marak, depante;
B oikorchi a'bachenge	:	Benardson Marak, depante;
C oikorchi a'bachenge	:	Cleanson Marak, depante;
D oikorchi a'bachenge	:	Debila Marak, demechik;
E oikorchi a'bachenge	:	Edmandson Marak, depante;
F oikorchi a'bachenge	:	Ferdinand Marak, depante;
G oikorchi a'bachenge	:	Genevieve Marak, demechik;
H oikorchi a'bachenge	:	Heberth Marak, depante;
I oikorchi a'bachenge	:	Ivanhoe Marak, depante.

☆☆☆☆☆☆☆☆

**Serikkot Ming 10:**

**CHIN MANDEBA ENGLISH MANDEMINGDE  
SOKCHAKGRIKAIA.**

*Chimonggipa : M. Rongmuthu*

Changsao Hongkongni English Governor dal'dalgipa manderangko okame cha ale on'aha. Ua alaona Chin a'songni A'song Baltigipa (Ambassador) Dr. Wellington Koo minggipakoba okamaha. Dr. Wellington Koo English ganding chindingko gangija jattang Chinni ganding chindingko gane re'angaha. Ua alaona on'tisa ja'manchakangaha. Ua apsan chango (tebil) English mande saksa baksa mikkanggrike asongaha. Cha'ani

cha'mitingo binbaksa mikkanggrike asonggipa English mande indine Dr. Wellington Kooko singaha: "What ESE are you ? – Burmese, Siamese, Chinese, Japanese? (Na'ara mai 'ESE'? – Burmesema, Siamesema, Chinesema, Japanesema?) Ia sing'ani namen chonnike sing'ani ine Dr. Wellington Koo rang'san uiaha. Ua ia sing'anina rangsan aganchakgija cha'anikon cha'enga, ringanikon ringenga; ku'gni ku'gittam cha'e, cha grokgni grokgittam ringe ua English mandeko miktenten nie indine singsikkaaha, "What 'KEY' are you ? – donkey, monkey, yankey?" (Na'ara mai 'KEY'? – donekyma (gadama), monkeyma (makkrema), yankeema (Americanma)?

English mande mamingkoba aganchakgija wakidikdik dongaijok.



### Serikkot Ming 11:

#### **NA'A 'ANGGRI' ENIA 'NANG'GRI' - NI ORTORANGKO UIAMA?**

*Chimonggipa : M. Rongmuthu*

Attamsao anga Duramong Williamson A. Sangmani noko roengachim. Uno adita me'aparang dongachim. Chinga me'aparang gopo ka'mitingo a'chik ku'sikni an'sua, ga'sua, su'uarangni gimin, enia A'chik jatni daktewalrangni gimin, agangrik agangriken, me'aparangoni saksa Pa Arabinda K. Sangma indine aganaha : "A'chikni mama-ada, jonga-gri ra'grik-changrikao nangni nogipa ba abitangni depanteko na'a gritang kam'dak nanga enia nangkoba bia matatang kam dak nanga. Matatang kam'dak A'chikni bewal gita gritang kam'dakko nokkrom rime chasongni chasongna ja'chongrika. Matatangni gritangko "O anggri" ine okamo, enia gritangni matatangni okamana, "Oe anga nang'gri" ine ku'rachakao ning'tuaa orto donga. Anggrini ortoa angni grijokode, chongmotan, angni siman-bon'mangjokode na'anjokne angni ja'chongde, nokdangko man-riknakgipade. Nang'grini ortoa, nangni grijokode, oe anganjok ine inani ong'a. A'chikni daktewalode nokkromde, oe anganjok ine inani ong'a. A'chikni daktewalode nokkromde matatangni siani ja'manode a'a-chi, rang-gam, matchu-matte, jik-de gropprop man'rikbebea. Dal'batsranggipa man'rikanian manitangko kimrikanian ong'a.

“Bebejok! bebejok! Nang’ni rikki-rikkot chanchirikkotaba chong’mot ong’bebejok,” ine uno donggipa pilakan mitteltokjok.



### Serikkot Ming 12:

#### ME’MANG CHROKATA.

*Agangipa : Malkan Rangrupa, Bangsi-Apal.*

Attamsao waltingo Bangsi-Apalni Malkan Rangrupa Dainadubi Thanao polisrang baksa chu ringaoni noktangchi wa’al nate re’angpilengachim. Ua Nokmakundi enia Nishangram songni gopram bolsalgrimko re’angna nangachim. Bolsalgrim gopramdama sokahaon bini re’a mikkangchini mande saksako jako atte bikpile ra’e re’baengako grongaha. Ua mande Rangrupako indine mong’aha, “Hae, ua songo manderang doke-danre, chrokmesae chu ringtokenga, angming chu ringna re’pabo.” Unon Rangrupani wa’al nataba delmrumru gimitangaha, gisikba mrikmrikmrakmrak dakangjok. Rangrupa ua mande baksa re’angon walni andalaba sal pilangjok, pilakchin jasengseng pangsangsang an’sengaijok. Songona sokangon Rangrupa Nokmakundi enia Nishangramni sianggimin gitcham manderangkosa niketokaha. Sianggimin gitcham manderangoni Nishangramni Pamong Tuniramkoba ua uano nikaaha. Songni sa’rako adita apbale done, nokrangko a’o pa’chape dule riktokachim. Manderangba nokrangoni a’ningchinisa prongprong dake ong’kattokbaakosa nikaha. Manderang Rangrupako niksoe, “Aiao Rangrupa re’bajok! Aiao Rangrupa re’bajok!” ine insotoke, uko asongate chu kantokaha. Unon uamang damarangko

“Timtimechok timechok,

Da’o re’bagipa korongchok;

Timtimechok timechok,

Da’o re’bagipa korongchok.”

ine doke Rangrupako walgimik chrokatjok. Wal seng’baon, me’mangrang Rangrupako sal salni angengjok ine agane mande sakgniko watate re’dilbaataha. Re’dilbagipa sakgni Rangrupako ge’a a’sama soke

dilbae, “De, da’ode ia ramako re’angbojok,” ine agane Rangrupako wate re’angaha.

Ia a’sel ong’aoni ja’mano Rangrupa antignina jime saaha.

Iako angra Rangrupa an’tangan Nishangramo agane on’aha. Malkan Rangrupa mrongsimsim, sko korongchoke, mangming bolming dake dala. Me’ mangni chrokato mairongpile biade dilim dilim dake chrokenggnok!



### **Serikkot Ming 13:**

#### **UA APSAN MANDEKON SIGNIONIKO UA APSAN MANDEAN CHANGGNINA KINGKING JOKATAHA.**

England-o London Songjinmao man’e chagipa rike donggipa, de’o rongjrigipa, agano ga’jetgipa nokdang damsas dongachim. Changsao ua nokdang nokgimikan songjinmao roa neng’ani, a’dok niroroe, balwa gital ringe an’tangtangko katchaatna ine songadamchi re’angaha. A’song ning’tuao rona an’senggipa songadam damsas dongachim. Ia songadamo chibolba damsas dongachim. Ia chibolni rikamon indake niroroe katchae rogiparangna neng’tak-wal-tuchina, saldonge rochina rike dongimin nokrangba dongachim. Nokrangni sa’rarango, sambik ketchirango nitogipa bibalrangan gapachim. Ua a’dam gimikko nirokchina, bibalrangna pangnan simsakchina uno mali saksako rakkiachim. Ia biapona ua London Songjinmani man’e chagipa, rikedonggipa, nokgimikko rimbagope re’bagipa adita salna saldonge rona sokbaaha.

Ia biapo saldonge romitingo ua man’e chagipani dedrang ua chibolo aue jroe roaha. Ia man’e chagipani depante saksas ua a’damni malini depanteming bilsis apsannangnang ong’achim. Salsao ua chibolo aue, jroe romitingo ua man’e chagipani depante wari tu’achi jroange sripe sinasiengachim. Uko nike bi’saskarang gimikan chriktoaha. Uko bakbak jokatna dalkala mandeba uno dongjachim. Indakmitingo ua malini depantesa, ua chibolo pangnan auronkimal, jrorongkimalgipasa, chisamo chandenge nie dongenggipasa chichi bak chrokprue, ua sripe siangenggipa bisachi bakbakan jroange, uko chisamchina salbae jokataha. Ua man’e chagipa, rikedonggipa Londonni mande an’tangni depanteko signioniko jokatana ua malini depanteko mittelbeaha. Una pangnan gro nanggipa

ong'a ine uie, ua maliko an'tangona okamate, indine sing'aha, "Nang'ni depantena angni mai dakako na'a nanga?" Unon ua mali an'tangni depanteko sing'ani ja'mano una indine aganchakaha, "Uade doktor ong'na skana." Unon ua man'e chagipa mande aganaha, "Nambea, anga nigen."

Ruutbea bilsini ja'mano ua malini depanteba ua man'e chagipani dakchakachi doktor ong'aha. Uan England a'songo changbatsranggipa, sapbatsranggipa doktor ong'aha. Enia ua chibolo sripe sinasigipa bisaba England a'songni Dal'batsranggipa Montri ongaha, enia a'gilsako dal'batsranggipa manderangoni saksa ong'aha.

Re'anggipa A'gilsak gimikni Gnigipa Dal'gipa Dakgrikani ong'mitingo a'gilsakni Bil Goera Sakgittam Persia a'songni skotong Teherano tom'mitingo Englandni Bil Goera rang'gitik Pneumonia (numonia ine gam'ratbo) sae sinasiahachim. (Pneumonia saako A'chikrang putguti saa ine minga) Unon Englandni raja an'tangni Dal'batsranggipa Montriko jokatna a'songo mingsingbatsranggipa, changbatsranggipa daktorko watataha. Uasa uko pneumoni saanoniko an'sengataha.

Ia doktorara Sir Alexander Flaming, ua malini depante. Pneumonia saao nina penicillin samko bikotchenggipa. Ua Englandni Dal'batsranggipa Montri enia a'gilsako dal'batsranggipa manderangoni saksa ong'gipara Winston Spencer Churchill Uan ua chibolo sripe sinasigipa bisachim. Ua apsan mandent apsan mandeko signioniko changgnina kingking jokataaniara ia a'gilsako ong'rongbregijagipa ong'ani.

Teherano tomgipa a'gilsakni Bil Goera Sakgittamara iamang : Americani United Statesni Duramong Franklin Delano Roosevelt; Union of Soviet Socialist Republic Duramong Joseph Stalin; enia England a'songni Dalbatsranggipa Montri Winston Spencer Churchill. Iamang sakgittaman a'gilsako tangmitingo chalangrang ong'tokachim, da'o me'mangrang ong'tokjok. Pneumonia saanina nambatsranggipa sam penicillinko bikotchenggipa Alexander Flamingba da'o me'mang ong'jok. Penicillin sam Pneumonia saanina nambatsranggipa sam ong'ani gimin uko Wonder drug ba aiao inmanpilgipa sam ine minga.



### **Serikkot Ming 14:**

#### **UAMANG MONGMA BURINGKO INDAKE TATAHA DINGAHA.**

*Agangipa : Pa Gendaram Sangma, Chiminmingiri*

Mouza No. IV, Laskar No. 56, Rongrenggiri jolo Kusiumkolgre songni a'bani mi misirangko burungni mongmarang cha'e bon'atengachim. Bilsu 1953, Julyni 18-gipa salo songni mande bisa saksu siako gopmane, chu ringmitingo songni manderang indake ku'mongaha, "Hai, da'alón an'ching songni manderang chimongkalenga, an'ching a'bani mi misirangko cha'e bon'atenggipa mongma jinmako rikgale galsrangna." Unon songni mande pangrakgipa, wa'sagipa, ka'donggipa sak 35 an'tangtangni jakkalgipa sel'urangko ra'e tomraktokaha. Iamangoni mitam mitamde chu pekmilangtokachim.

Mande sak 35 a'ba a'samoni a'boke, hohoe mongma jinmako rikchakatangaha. Mongmarang dol dol dake katangaha. Katanggipa mongmarangoni mangbri dingtangmancha ma'eke katangaha. Salpaksana kingking rikangoba uamang mongmarangko srapjaha. Ku'simkolgre enia Simsanggreni aking siminagrikona sokon mande sak 35 ong'gipa sokkrime ua biapon tomrake indake agangrikaha, "Da'o mongma chel'e katangaha; hai an'ching da'o rikgalako dontonggnok." Ia biap chachaon chambu bol gongdang dotsa dal'a dongachim.

Uamangoni mande sak 7 ua chambu bol gongdangchi gadoange niwatataha. Uamang mamingba mongmani kata ja'ku gam'arangko knajaha. Bolo gakate nigipa mande saksni a'boke niataha. Unon mongma mangbri ma'eke katanggipa me'ga mitino dongnugipa, prikprak nakatjok; mangbrini gisepo dal'batgipa sanggra bisongchi chabajok. Unon mande sak 28 chambu bol gongdango wilwile chake, sel'utangtangko mongma mikkangchi sachaktokaha. Unon mongma ki'sangchi bitinaha. Mongma sanggra da'oba rang'san chabataiaha, unon mande sak 23 skang gitan sel'urangko chro sachaktaiaha; ianpako mongma manderangni sel'u sachakako rang'san dokgripaha. Unon manderangni sachakgipa sel'urang a'aona ga'aktokaha. Unon bolkosako gakatgipa mande saksni sel'utangtangchi mongmako gochokaha. Enikoa a'o chakgipa manderang sel'utangtangko a'oniko kolampile man'an man'a mongmako dimdam dimdam gochoktokaha. Sel'u ponggeng ponggeng mongma be'eno napako manggipin mongma ki'sang ki'sang re'e rang'san oke galaha. Indake uamang mongma buringko buringon bilonge taton, dingon manderangni

sel'urang mitamrang be'tongaha, mitamrang gonggilaha.

Mongmaba namen mata buako man'e saknae, namen ka'onange mande jinmaoniko sakdokko rang'san rim'sropaha. Rim'sropa man'gimin sakdokoni saksako, Changding minggipako, mongma an'tang jako ketket man'e, ja'achi ga'roprope chel'achi gobrangataha. Uko nike warachakgipa manderang rang'san bildingbildang kattokaha. Unon su'a man'gipa mongmaba manderangni kene katako nike rang'san chrikprete katangaha. Bildingbildang katgipa manderangoni ua songni nokma Jongbak Nokma nenggitichak ja'pango nape chakachim. Ukon chrikprete katanggipa mongma'an ga'plengmanangsrangaha. Ua mongmani ga'plengmanako man'gipa mandede a'ningchi chelbak dipet napchapangaha; ja'samgni ja'ade salgichi songkengkengaiaha. Ua mande rang'san siaha. Mongma manggnide mongma manggnigipaskani manderang baksa warachakako nie dongaiachim.

Uni ja'mano Ku'simkolgreni mande sakgni Laskerchi ia a'sel ong'ako niechina rikangaha. Ja'mano Lasker an'tangni Sorkar, Sordar enia sepanggipa songrangni mande gimik sak 285-ko rime, slai pongsni ra'e, mongmako tatram, dingram biapchi re'ange mongma dokgipa mandeko enia ga'plengmananggimin mandeko nieaha.

Mande jinma sokangosa bolo gagipa mande saksnide a'ona ong'ontokaha.

Mongma tatram dingram a'damde namen a'min songminjok; mande anchi, mongma an'chi a'dam gimikan kalchekgimikaijok. Tatgipa, dinggipa manderangoni saksnide mata-buako man'e jopjok jimjok. Mande manggisi sakgniko songona ripebaon walba waljok. Mongmarangba songsam noksamona re'bae walgimik bola wa'a pe'e, songko re'dule chrikpret-mikoprete roaha. Songni manderangde walgimik walko walsengataijok.

Salgipino songoni miksotdok chel'ao manggisiko gopna a'kol cho'oba mongmarang sambaona re'ba re'bae randingana pa'jae nok sambaon a'kol cho'e gope galna nangaiaha.

Uni jamano Ku'simkolgre songni a'bani mi misirangko bon'e cha'tokaha, enia gipin gipin songni a'bani mi misirangko ga'pneke gimaatsrangaha. Indake mongmarang manderangni kosako a'jak sokskaha.



### **Serikkot Ming 15:**

#### **A'CHIK SAKSA MATBILKO SU'TEKTEKE WATA.**

Attamsao attam walsimsimao Pulbari Forest Office-o Pulbari Range-ni Forest Ranger Shillongoni re'bagipa Audit Officer sakgittamko gopo ka'e rodilengachim. Gopo ka'en ka'en ua Ranger an'tangni buringre'amao (sikar ka'o) a'sel chagrongako indine aganaha :

"Anga Naguapara Forest Beat-o Head Guard ong'miting. Slai kartos pongsako bredaldalmiting. Slai man'daldalaniko buring re'amna sikprete attamangachibara, gittam salwelao (bajio) bolsalgrim buringchi A'chik mande saksako rimbite re'angaha. Ua A'chik mandea a'ronggani, kam'damdandake dala, ja'patte, jakpatte emsik emsik dake dal'a, chel dal'a, mande bilaka, wa'saa. Bolsalgrim joljol re'roro am'roro dakangon chinga adita buring diltuangachi sokangjok. Unon rang'gitik, ching mikkangtangon, sepangbeaon, matbil mangsako jenten grongjok. Matbil agre sepang beani gimin anga gona pa'japilaha; slaikoba pangnaba goe nikuja. Indake angni jajajiji dakmitingochacha ang baksa re'pagipa A'chik mandesa ra'bitatang atteko gale, rang'san matbilo bildape, nachil samgnio jakmagni rim'e, bil man'an man'a, matbil janggilo gakate, ja'pak sepdape, bil man'an man'a, matbil ku'sikko a'oe, boloe, rong'oe, jeo man'a su'tektekkame su'tekroroangaha. Indakmitingo angade slai ra'e nikuake, chadenge dongaiaha; gonaba maidake gosrangkuna, mandeko nangna kene gojasrangaha. Adita su'tektekani ja'mano ua mande neng'a amchakjae matbilko bang dake watataha. Matbil rang'san katangaha. Unoba angade matbilko gorikjasrangaha.

Iani jamano chinga biaptangchin jakrara re'bapilaiaha. Ian angni slai ra'chengo buringre'amchengo a'sel chagrongchengani ong'a."





## Serikkot Ming 16:

### **MATDI' GIT'OKGRENGO.**

*Agangipa : Mingsan Tegitdi Sangma, Dinaminggre.*

Britishmi chasongo, A'chik A'songo, Mouza Brigipao, Simsang  
chijolo, Dinaminggre songo, wachi kario, a'ronggao a'bani mirang poksu  
poksu ong'e minbamiting. A'bani mirangko walwal matdi (ba marong)  
mangsa cha'e bonatrongengachim. Salsao songni bilakwa'sagipa pante  
enia me'apa gimik ua matdiko gipin biapchi rikgalna, man'ode mangkimae  
galna, sel'u, milam, ra'toke songni sa'-rao tomdakaha. Songo slai  
pongsamangmang donga, uabaan kepdalsa. Ua slai nokgipaba  
silchekgnang ja'chokko doksote ukon gotda guli dake, sike ong'kataha.

Songni manderang melakrimani ja'mano songni nokma slai  
donggipa mandena indine aganaha, "Na'a a'bri gisepo timsobo, chinga  
ua a'dok gimikko dule, changgome, a'boke, hohoe inchroe rikbana. Nama  
namja ong'oa, a'dingchi raradeo katbo, chaknanga biapo, chel'aoniko  
niksona man'na gita timsobo."

Songni mande pante pangrakgipa me'apa wa'sagipa gimikan matdi  
chakgipa a'damchi re'angtokaha. Slai ra'gipaba a'bri a'kongkep a'dam  
namao biap ra'e dongsoaha.

Aditani ja'mano, beanbebe, a'bri, a'ding, buring bolgrim, kimko  
kimko, bikbo bikbo a'boka, hohoa, inchroa ku'rangko slai ra'e timsogipa  
mande knaha. Rikbaani ku'rang sepangrorobaon, timsogipa mande adita  
chel'ao matdini nakatako nikataha. Matdi bichinan mikkange nachil  
de'krange, sko il'engpileng dake, dongdip dongdip dake re'baengachim.  
Ia mande da'o ka'tong rongchu su'an onchajaengachim.  
Sepangkalmanchao, matdi ontisa gitok de'krango, ka'kolo chelchik  
gisepgriko nisan ka'e goataha. Slai tim gam'anin matdi rang'san chabaha.  
Mandeba rang'san jakrachi a'dingchi bakan kate katdoachim, indiba  
asongchike, ja'gugue, ruute timsoani ja'arang chimitanin ong'jokma, ba  
a'sel nangap soken a'sel ong'ama uijajok, ua mande ganggilbae matdini  
gitokgrengo tiktak gatdambenga gita ga'akjetaaha. Matdide a'chi  
bamchike, grong de'krangesa kena chabaengajokona, gitokgrengo  
gatdambenge mandeni ga'akjeton, grong samgnichi mandeko sinjete, sko  
de'krange katdilangaha.

Matdi mande ra'bita gnang a'jrichina katangaha. Rikbagipa

manderang slai gam'ako knae jripjrip daktokaha. Unon uamang gimikan manden' ku'rang "ANGKO, ANGKO. ANGKO" ine chrikako knaaha. Unon uamang gimikan ku'rang gam'a biidingchi chabatokaha. Mata man'gimin matdide namen kenbeani ong'a ine songni mande gimikan uiachim. Unigimin uamang biap damsao sokkrimahaoa ku'rang gam'a a'jrichi miksongtoke chadengtokaha. Mande ra'bitanggipa matdi a'jri a'dingko ka'sne re'doangengachim; mandeni ku'rang "ANGKO, ANGKO" inaba ku'tipangaengachim. Unon rang'san ku'rang jripjrang ong'jok. "ANGKO, ANGKO" inakoba knajajok. Unon songni manderangoni saksa ka'a dongtojae, "Mai ong'a, namengama?" ine a'bokataha. Unon ua mande, "Anga namenga, anga ino ga'akrikjok" in a'bokchakataha. Unosa manderang ka'a dim'dimtokaha.

Matdiba a'sa katangarin sijok. Indiba songni manderang ua matdiko marang nanga ine ole cha'jajok.



### Serikkot Ming 17:

#### DA'ORORONI JONAH.

An'chinga pilakan Sastrooniko Jonah Katchinikgipako sagalchi galatao timi na'tokni minokako enia na'tokni okningo maikai salgittam walgittam dongaha uko poraie uina man'a.

Da'ororoni chasongba Jonah Katchinikgipako gitan mande saksako timi na'tok minokaha. Ua mande Jonah Katchinikgipa gitan, na'tokni okningo salgitam walgittam dongjaoba, ruutbea welarangna (kantarangna) tangaha. Ua na'tokni minokako man'gipa mandea English mande James Bartley minggipa, saksa kalasi. Uani gimin saksa French gisikaningbitgipa mande indake seaha:

"1891 bilsini February jao 'Star Of The East' minggipa ringnokma Falkland chichangrangni sepangko choangengmitingo mel gittam chel'aoniko dal'begipa timi na'tok (sperm whale) mangsako nikataha. Uko nikate ring kangni uchina choangaha enia aditani ja'mano silchongkeng (harpoon) pongsachi uko gochokataha, indiba ua gnigipa ring timi na'tokni kime satpake bikpilatako man'aha, unon manderang

gimikan sagalo gitchothokaha. Mande saksade chi ringpeke siaha, enia James Bartleykode nikan nikjasrangaha. Adita welarangni ja'mano ua timi na'tokko siatsrangna man'aha, enia uko ringnokmani manderang gimikan timi na'tokni be'en enia mitinrangko sutin sutine ringnokmao dontokaha. Uamang indake salgimik eni walpaksa sutintoke dandaktokaha.

"Pringgipino uamang timi na'tokni bikmako kengbinggipachi kengbinge ringnokmani kosakgipa gadangona (deck-ona) de'doe donaha. Unon timi na'tokni bikmao maiba gil'jik gil'jik dake moako ringnokmani kalasirang niktokaha. Uko raprake nioara bisongni gimaenggipa mandekosa, kom'tote, siboke dongengakosa nikaha. Uko atomoniko ra'ongkate, uko sagalni chichi auataha, unon ua tangbapilaha, indiba bini gisik mikseljaha. Uko ringnokmani pamongni kutirio tuate sanaha. Ua antignina kingkingde korechiaiaha. Ua ringnokma pamong enia gipin gipin kamka'giparang biko ka'sae enia simsakbee sanaha. Anti gittamni ja'mano bini gisikrang srangangaha. Uni ja'mano ua kamtangko ka'angpilna man'aha."

"timi na'tokni okningo dongmitingo Bartleyni bigilrang timi na'tokni okningni ku'chirangchi gilskokatako man'tokenba angimikan bimang dingtangsrangaha. Bini mik kang, gitok enia jakrang gimikan bokdimdim daktokaha."

"Bartley timi na'tokni ki'me satpakakosan gisikra'aiaha, unikode rim'amanpilgipa andalakosan uiaiaha enia rinokgipa enia an'tangtangari il'enggipa rama gita tang'srongangengakosan uiaiaha. Jakrangchi rim'brake nioa, rimilgipa, rim'na an'chakgijakosa rim'manaiaha. Timini okningo ua altue rang'sitna man'a, indiba ding'an agrepila. Uni ja'manode bia ringnokmani pamongni kuturio dongakosa gisikra'aajok. Ja'mansrangode ua mande gisikde srangsrang mikselrangjok, indiba bini angilrangde mamingsaloba skanggitade ong'taipiljaha. Siaona kingking bini an'gilrangde bokdimdim dake dongkamajok."



### **Serikkot Ming 18:**

#### **SOKMIL BITERANG OKNINGONI OKNINGONA.**

A'chik A'songo, song damsao, (angade songkoba uia, indiba aganjawa angade ukode na'songnade) balrorokario, sal-ding'kario,

a'galmak April jao salsao songadamni pante saksa, ja'a jaka ja'takim jaktakim dake dal'gipa, bila jaka rakgipa, takkimkim mangrakgipa, sokmil bakchongsako rongritchasa bate minokdamdamjok. Salgipino ua a'galmak a'bao salgimik kongsi kongdang, gramchi poksu poksue, an'gimik a'galmak nangstipe a'sel gamu rim'jok dangjok. A'bao a'ba a'senangnangchi rong'toto pangmajara, kosako pattal daka, totsaa dongachim. Attam salniangachibara ua ki'na sikbajok. Unon ua rong-pattalona gadoe, a'bachii janggil dite, a'sechi mikkang chake, ki'tong changkete, ruute sang'petpete, salgipino minokdama sokmil kakketko pakruru-pakdamdame ki'galtokke joljol songchi re'bajok.

Karitang sokana gisepgisep mikkaba jime jime wajok; salba sal change change gisep gisep ga'sue rakjok. June ja; a'bani mi misirang, adangkit me'rakkurang a'bagimik bandil bandil, tangsekgilgil silcha dal'chamiting; sam bolrangba, wakme budurangba a'gilpinna sekseke dal'seksekbamiting. Salsao ua a'bakon sakgittam me'tra grangchakchak, an'gilchak pa'atjangjang, wachin'salak chengchengbengbengko chake a'a gamtokjok. Saljatchi sal pe'gitiko, a'a gama jangango, me'tra sakgittamoni saksa, balwa balsri balana, a'ba ba'ku tang'ana ka'dinge, a'bok gogaie, gogaiwae doke, gosaiwae ring'e ua rong'tot dal'gipa pattalchin, ua panteni ki'prakgipachin gadoangjok. Unon ua me'tra ua pattalo piprae, barame rama sokmilko nikjok. Me'tra rang'san ku'chi mitape ripengtang sakgniko okamatjok. Wachi chol'chol waanin, ki'i bichinik rektek dongjakok; sal ga'supettange rakanin sokmil ran'kokaktokke senga biba dongjajok. Salchichamine, ku'chi mitchokminen, ua metra sakgittam ua sokmilrangko bon'-rok-bon'toke minokseksektokjok.

Attam salnio, nokchina sokpilo ua me'trarangoni saksa chigatchi aumiksueon, ua pantechachaba aumiksu man'e, gansree chinsree ba'ra su'soengachim. Ua me'tra rasonggragra ua pantena indine aganaha, "Da'salde chingade saniba sokmil, rong-pattalo ramgalako cha'e suk ong'bejok." Ua pante uko knae, mamingba agan-bo'olgija jripjrip dongaijok.

★★★★★★

### Serikkot Mling 19:

#### **UIANI BIGINCHI SASTRO NIAM GITCHAMONI.**

A'gilsako janggi tangbakrobatsranggipa mandea Enokni depante METHUSELA onga. Uni janggi tangani gimik bilsia 969 ong'a. (Aba.

5:27) Sastro Gitchamni nungsingbegipa mande saksnini janggi tangani bilsirangko chandimani gimik bilsia Methuselani bilsu gita tiktak ong'a. Da'o nibo :

1.	ABRAHAM-ni (Aba.25:7)	bilsu	....	175
2.	SARA-ni (Aba. 23:1)	bilsu	....	127
3.	ISHAK-ni (Aba. 35:28)	bilsu	....	180
4.	JAKOB-ni (Aba. 47:28)	bilsu	....	147
5.	JOSEPH-ni (Aba.50:26)	bilsu	....	110
6.	MOSE-ni (Deu. 34:7)	bilsu	....	120
7.	JOSHUA-ni (Josh. 24:29)	bilsu	....	110

---

969

Iaban aiaoinmanani.

☆☆☆☆☆☆☆☆

### Serikkot Ming 20:

#### **A'CHIKNI AGANANI GITAN : DAWAN DE.**

"A'chikrang chiwari tu'ako jroe auao, chibima chibanarango jrobato, maina Dawan' De! Dawan' De!" (chongmotan Dawani de) ine gam're agantoree, uko na'a uiama?" ine changsao Nishangram High Schoolo ka'rimmitingo Kosan G. Momin angong sing'aha. "Angade uija" ine anga aganchakaha. "Indiba angaba bisamiting bisaskarangming chibima wario aue jromitingrango "Dawan' De, Dawan' De" ine ku'rang goegoe jrorongachim. Uniko a'ronggani manderangde, Bong Nikgil cha'na Simsang chibimako ringo choonmitingrango enia anti cha'e matchote chodobamitingrango, pangnan jinma jinma kewal bikdip bikdipe, grae grae "Dawan' de, Dawan' de" ine ku'rang goe goe choronga. Maming maming mangsongako a'ipagijasa jinmani minganasa ia katta minggniko anga mingpaiachim. Me'aparangoba angaba uani gimin sing'aba dongjachim; me'aparangba saksaba agane on'aba dongjachim."

Indake A'chik Katta Gitcham Aganarangde ma'gitcham pagitchamrangming gimachipangrongaiachim.

Kosan G. Momin, A'chik Kristian ong'chenggipa sakgittamoni

saksa Rangu Moninni chawarigipa, Nishangram Middle English Schoolo ruuta bilsina Head Pandit ong'e skianggipa enia India Jakgiellani ja'mano Nishangram High School ong'aona kingking karanggipa indine agana:

Chengo A'chik A'songo Dimbilbri Palwang A'ding antiko mande brin matchadu matchabet brin anti cha'achim. Ua antiko cha'e A'chik mande saksa songtangchina re'bapilmitingo ramadilo Na'nil Singsepani, Bugarik-Bugasilni, Matpu Maluapani, Aringga Gren Gingenni padot Rengsin Gingbo A'igija Chalo Ma'sigijako dongaridong dang rim'ari nateng natong teke, ja'ko jakko kakomtote donangaha.

Rengsin Gingbo A'igija Chalo Ma'sigija namen saknahee, chaktodongtogija dake dongna nangaha. Adita ruutani ja'mano ua apsan ramadual gita Dimbilbri Palwang A'ding antioni mande saksa uko nikaaha. Unon Rengsin Gingbo A'igija Chalo Ma'sigija ua mandeo antangko ja'a-jaka kakomtotanioniko enge watchina, nateng natong tekako oke galchina molmolaha. Unon ua mande bina ka'sachake bini natengoniko natong tekako oke galaha, ja'ko-jakko kakomtotaoniko enge wataha.

Rengsin Gingbo Aigija Chalo Ma'sigija namen katchabee ua mandeo biming mai minga, chatchia badi de'a uarangko sing'achatchiko DAWA ine aganaha. Unon Rengsin Gingbo A'igija Chalo Ma'sigija namen saknae duk ong'e indine aganaha, "Angko dongari dongdang sakna sitengtoatani gimin anga enia angni deritchu, enia ang chatchi angbakrangni deritchuni deritchu chasongni chasongna manden ma'kringni kosako a'jak sokgen. Chibimarango auao mandeko anga chiningchi salpinape siatgen; ring choarangko bikipilate warima singsingkolchi anga ra'napgen; chisan ja'skuo grongdiko peng'pat-suat anga ja'pee, sripe anga siatgen. Angni ma'-kringni deritchuni deritchu mandeni koasko chasong budongna a'jak sokengmitingo nang'ni ma'kringni deritchurang angni ma'kringni deritchurangni a'jak sokao sokchapako man'jana gita, nangni deritchurangko angni deritchurang pangnan uina gita, chiwario jromitingrango, chibanao ringchoarangko pangnan DAWAN' DE, DAWAN' DE ine ku'rang gorongchina aganangbo. Unon angni deritchu su'ritchurang, angni chatchi angbakrang Bugarik Bugasilni Na'nil Singsepani deritchurang pangnan nangni deritchurangni DAWAN' DE, DAWAN' DE ine aganwat-a'bokwatako knaon nangni angko ka'sae jokatako gisik ra'ronggen. Unon uamang na'songni ma'kringrangko pangnaba kal'akjawa, sningjawa, siatjawa, bonatjawa.

Ia A'chik mandea A'chik ma'kring gimiknan ua Rengsin Gingbo A'igija Chalo Ma'sigijani agangipa katta minggni "DAWAN' DE"

■ ngipako chibanarango jrobatarango, ring choarango, warimarango jroe  
■ aumitingrango chisronge sijana gita ku'rang gorongchina aganaha. Untalsa  
A'chikranga da'alona kingking chibanarang jrobatoba, ring chooba,  
warimarango jroroe auoba pangnan "DAWAN' DE, DAWAN' DE" ine  
kurang gorongenga ine A'chikrang agana. Aiao! ia DAWA chatchini  
namgniko dakania A'chik Ma'kring gimiknan namgni ong'bejok!

Ua mandeni Rengsin Gingbo A'igija Chalo Ma'sigijani natengo  
ka'saninggija dake nateng samgni natong napilgrike tekaniara bini deritchu  
su'ritchurangni nateng samgnion da'alona kingking kol'okrok dake  
chasongni chasongna mandeni ka'saninggija dakani pariko mesokna nateng  
samgnion, aringgao, matpuo, pusilo, nanilo kol'okrok dakako an'ching  
da'alona kingking nikengpiti ine A'chikrang agana.

Aiao, namgijani bitea pangna dongkama !

### Serikkot Ming 21:

#### **OXSAMBENGO KI'SANGKOL DONGGIPA MANDE.**

*Agangipa : Modon Sangma Hangsang, Rongrenggiri.*

A'chik A'songo Mouza Bri-o Samandagre songo Senggat Sangma  
Nengminzani depante bilsa chi'gnini me'a bisa Mingjang Sangma  
Mangsang dongachim. Ua bisa naringgijagipa, rokrek bal'ek dagkipa  
bisade ongjachim.

Sanggatni noksamo waknol sambao wa'ringko songdoe nakapko  
wedoata pangsa dongachim. A'rak sokjok; ua nakap wedoe bibal bale  
bite nangengachim. Salsao Minjang ua nakap biteko akna maldongaha;  
nakap wedochakgipa wa'a wachi ripote, rang'san mande gnang be'tonge  
ga'akonbaha.

Ka'mao donggipa waknolo bakchoke songdogipa sremchokgipa  
wa'tre dotsao ua bisa ga'achakeon bini ki'sangkol tikatako dattinge  
jakasi oksambengo bibik gnang naprueaha.

Ua apsan song Samandagreon Rachan Bolong Nengminza sam  
man'gipa mande saksa dongachim. Ua oja ua bisani mata pariko samrae  
namataha. Oksambengo napon'gipa bibikkon ua apalchi nagalgipa bibikko  
ratonge ukon ki'i jokbaatani ki'sangkol dake tariskaaha. Ki'sangkol

asolkode ua sam ra'e namipataha. Untal da'ona kingking ia mande Minjang jakasi oksambengo naponggipa bibik gita ki'skaenga.

Minjang Sangma Mangsang da'o Nengminza mechikko kime bisa sakdokni pagipa ong'e Samandagre songon janggi tange dongenga. Ua da'o bilsa 40 mang ong'jok.

★★★★★★

### Serikkot Ming 22:

#### **TOROMI ONG'BATSRANGGIPA MANDE SAKGITTAM.**

Jihova an'tangan Ezekiel Katchinikgipachi toromi ongbatsranggipa mande sakgittamko mingaha. Uamang iamang : NOA, DANIEL enia JOB. (Ezekiel 14:14,20).

★★★★★★

### Serikkot Ming 23:

#### **SIMANO ATCHITAIA**

Ia a'gilsako mitam mande simano atchitaia ine a'gilsakni pilak jatan beber'a. Simano atchitaia ine A'chikrangba gipin gipin jatrang gitan beber'a. Mande sion bini janggia badiaba mechikni oko keenggipa bisao bakan japinapeskaa, mitam mande sigipani janggia adita jarangni ja'mano, mitamara ruuta bilsirangni ja'mano atchitaia ine agana. Iani bidingo bang'a gisika'ningbitgiparang a'gilsakni dingtang dingtang jatrangoniko che'em che'em sandie seaha. Mande simano atchitaichongmota ine bang'en sakkirangko man'aha aro ua sakkiranga babe ong'chongmota ine atchitaigipa manderangan skang atchigitchamo maimaidae janggi tangbaaha, maimai a'selrangko chagrongaha uarangko agana man'toka aro ua a'sel ong'giminranga pilakan bebe ong'toka ine sandie nio man'toka.

Indake atchitaigipa mande ku'sik srange man'ahaon, bisamiting salrango skanggipa atchiao maimai dake janggi tangbaha, mai mai a'selrangko chagrongaha uarang gimikkon rongtale aganna man'a. Iani bidingo gisikgnanggipa manderang da'along kingking a'gilsakni dingtang



dingtang jatrangoniko sandikuenga enia bang'a ong'chongmogiminrangko bang'en man'angenga. Indake sandigiminrangoniko minggniko kamao mesokenga; skanggipa an'ching Indiani, gnigipa Europeni.

## I

Indiao Delhini sepango donggipa Chirakdana minggipa songo bilsi chetni mechik bisa Shanto Kumari minggipa dongachim. Uan Rang Bahadur Mathur minggipani demechik. Ku'sik srange aganna man'barin ua an'tangni skanggipa atchiao janggi tangani giminsa pangnan aganrongaiachim. Uni agananirangna ma'apa bisani belbelanisa ine gisiknangjaha. Indiba saksa English mande ia bisani aiao inmanpilgipa agananirangni gimin knae gisik nangaha aro ua mechik bisani skango janggi tangbaani gimin namedake sandiaha. Ua mechik bisa namedake brigimin mechikma gitan rongtale che'em che'eman skango mechik ong'e janggi tangbaako aganna man'a.

Uni aganani kri ua skango mechik ong'a; segipako Pandit Kidarnath Chaubey minga; depante saksa donga aro Mutra minggipa songo donga. Iako sandion Pandit Kidarnath Chaubey minggipaba Mutra minggipa songo dongbebea enia uni skanggipa kimchenggipa jikgipa sijok aro uni siara Shanto Kumarini atchina skang jasku ong'a ine nikaha. Ja'mano ua Pandit Delhio donggipa antangni jonggipako ua mechik bisako re'ange niechina aganataha. Jonggipa adatangni ge'eta gita re'ange sandie nioara ua mechik bisa skang atchigitchamo Pandit Chaubeyni jikgipa ong'e dongani nokdangni obosta gimikkon rongtale, noko maimai jakalanirang donga che'em che'em aganaha aro segipani poraironggipa kitaprangkoba aganataha. Bonkame Chaubeyni jikgipa ong'e dongmitingo kuturi damsani nokking mitapo an'tangni tangka donakoba aganataha. Ia gimik nokdangni gimin ua mechik bisani aganara gimikan tik ongtoka enia bini tangka donuakoba noking mitaponiko bini aganagita nioara nika.

Jonggipani indake sandie aganani ja'mano bonkamao Pandit Kidarnath Chaubey an'tangan 1935 bilsini November jani 13-gipa salo jik skanggipachi mangipa depanteko rimbite enia jik siani ja'mano kimtaigipa jikgipako rimbite Mutra songchi Rang Mahadur Mathurni nokchina re'baaha. Rang Bahadur Mathurni nokona sokeon mechik bisa Shanta Kumari atchigitchamni an'tangni segipako enia bisatangko nikarin

rang'sanan uiaha, enia atchigitchamo janggi tangbao pilak ong'arangko agane on'ahaon Pandit Kedarnath Chaubey bebera'gijan dongma manjaha.

Shanta Kumari da'o depantetangni ma'gipa ong'taina man'gijaniko nikon, maina da'o bini bisa bina bilsibri batjok, enia ma'apa gitalko watna man'gijako nikon, ua namen grapbeaha.

## II

Minggipin, Europe a'songo ong'a obostani giminba da'o knabo. laban atchitaiani gimin. Maikai saksa mechik songreangmitingo dintangmancha biaprangko nikrooangon, atchigitcham janggi tangbaniko rang'san gisiko nabaha.

Budapest songjinmani saksa ukil bia ka'daldale an'senggipa biaprangchi rojojoangengachim. Danube chibima kosakchi ringnokmao chodoangmitingo Bavariani Passau minggipaona sokon ringnokma bodolina nangani gimin uamang ong'onaha. Ringnokman gipino gaange chibima kosakchi chodoangmitingo jikgipa an'tangna indine aganaha," Ia biaprangde angni nikmangiminrangde." Unon ua segipao rangsan gipake indine aganaha," Ia jolo anga ruuta bilsina dongchongmotaha. Uko anga uia. Hawa a'brini pilsao a'kawe apala damsangdonga, uko chiring chongipa joksota; chiring samgnichin bolrang chaa." Uni agane gita sandie nioa tik ong'a ine nikaha. Segipa aiaoinmanna abachengaha.

Jikgipa rang'san be'en an'sengjana a'bachengaha. "Anga dongangchana manja. Ringoni an'ching ong'onjaode angade sigen ine anga nikenga," ine jikgipa aganaha. Jikgipana jajrengchake chi rikamo donggipa sokchenggipa songon ong'one dakdorchi rimna mangsongaha. Uandaken dakaba dakaha. Pilakko agane on'ako knaon dakdor salsa salgni nengtakani jamanon nampilgen ine aganaha. Indiba ua mechik ua gimikkon knachakjaha. Batesa ua so'sojengjeng neng'nengjokjok dakaha.

"Anga ia biapko rang'san nina nanga. Ia biapo skango angna maiba a'sel ong'managitachacha anga nikman'enga; anga iano maikoba dakna nanga gita nikmanenga."

Segipa uko tomtomatna jotton ka'aha, indiba magnasa. Jikgipa segipani jakpongoni chiltete jol'jolari re'angaha. Unon ua songni mechik buchuma saksako gronge uko indine sing'aha, "Hawa a'brio nokmong

gitcham dongama?"

"Oe, donga, indiba uo mande dongja. Na'a namnikode anga nangko uchi dilna mangen," ine ua buchuma aganaha.

"Nangjawa, nangko mittela, anga ramako uia," ine agane ua mechik a'brichina dakdoanggipa apchonggipa ramako doangaha, segipa ja'man ja'man ja'rikangaha. Uamang jikse gitchambegipa rurongangenggipa nokmongmaona sokangon uko rakkigipa budepao ua nokmongmani ning'chi napna biaha. Ua budepa indine aganaha, "Ia nokmongmao re'anggipa bilsa sotbonga ba sotoakna kingking mande dongjaha."

"Anga uia, anga uia," ine ua mechik aganpengpangaha. "Angni nina sikbeenggipade matgrikni kuturi."

Ua budepa aiaoinmanaha.

"Na'a ianona changsaba re'bakuja. Na'a maidake ia pilakni gimin uia ?" ine ua budepa ua mechiko sing'aha.

Ua ia sing'anina mamingba aganchakgija ua noko dongkimal gita ua kuturichi re'dilangaha.

"Iano chabi teke dongimin kuturi damsa donga, uko chingna mesokbo," ine ua mechik aganaha.

"Chongmot, donga, indiba angni gisikra'a ua kuturiko pangnaba oja, uni chabiba gimajok," ine budepa aganaha.

"Jeba ong'chong, anga ua kuturichi napna nanga," ine ua mechik inaha. "Chabi chong'baksa ua gitcham.jang'keni kokkimao donga. Uko inona ra'babo. Gimagipa chabi uanon."

Aganata gita ua budepa re'anggalgale ua chabi chong'baksako ra'bae ua mechikna on'eaha. Mechik ua chabi chong'bakoniko gitchambegipa chabi kansako seoke, "Ia ua kuturini chabi, ine aganaha. Uamang gimikan kuturichina re'angtokaha.


"Ua kuturio mande sakgnini manggisi donga, unigiminsa ia dogako chabi teke dona," ine ua mechik so'sojengjeng ong'e aganaha.

Ua budepa jajrenga gnang ua chabiko kolo siktekate el'ataha. Ua dogako pangnaba ojani gimin ua do'ga namen rakbeachim. Rake salpake ua do'gako oaha. Do'gako oa man'arin ua mechik kuturichi chasinape kelkiko ping'gipa ritthagipa pordako oprakataha.

Palango mande saksani manggisi ran'kokakgimin dongachim, enia

a'waseoba mande saksani manggisi dongachim enia ketchio maram chagimin kettal mangsaba dongachim.

"Ia kuturi manchaon angko so'otaha" ine agane ua mechik a'waseo gitilgrope sibokaha.



### Serikkot Mlng 24:

#### **MATCHA PIL'GIPA MANDENI NOKDANGO.**

*Agangipa : Mitra Sangma, Dalu, Garo Hills.*

1959 bilsini March jamango NOSARI-BANDARI wariko nina anga Ganchi Kalakgiri songona re'angaha. Songona sokon salba napjok enia songni manderangba meattam cha'sojok. Anga songni jatchio donggipa nokona waltuna re'angaha. Uamang angni biming, song, chatchi enia songona re'baani miksongani pilakko sing'tokmano angnaba mi song'e chane on'aha. Meattam cha'mano, nokni dring jatchio asonge, mola tamakku ringe nokni nokgipa me'asa baksa wal'timo gopo kae roengachim. Indakmitingo jikgipade nokdringo mitdu mitdu saksan agangrikengachim. Adita saksan indake belbelmitingo angko rodilenggipa segipakoba an'tangni dongenggipa nokdringona okamataha. Angkode rochakenggipa biapo saksan gale uamang jiksese sakgnide nokdringo mitdu mitdu agangrikengachim. Uamangni inditana kingking ruutchaie nokdringo sakgnisan agangrikani gimin angkon namnikjae maikoba dakna miksongengakon ine chanchie angaba kensiksik dakpilengjokchim. Ja'manoa an'tangba uina sikenba uamangni agangrikenggipa nokdringni sambaona sriksrik re'ange knatimeoa, "Manijaengasae' manijaengasae, maikon dakgnok," ine jikgipani aganako knaha.

"On'chongmotjawa, on'chongmotjawa ukode" ine segipa aganskaaha. "Indiba manichongmotjaenga", ine jikgipa aganchakaha. "Indide gipinkoa maidakgen?" ine segipa sing'aha.

Ia kattarangko aganmitingode angade angkon aganengakon ine chanchie kensiksik dake katna chanchipilengjokchim. Adita jrip dongani jamano jikgipa agantaiaha, "Indide an'chingni jilgipa wakkon on'aignokma?" ine aganarin noksam nokgiloni rang'san "grao grao" ine gam'e bildangdange a'kongchipakoni "uek, uek" ine wakni mikoangakosa knarikpaijok. Unosa ka'timtim dake segipaba angni asongram biapona re'bapilaha. An'tangtangni angko saksan inditana ruute galchipa gita dakani gimin angko kerna biaha." Aiao nangkode galchipa gita dakaijokne.

Ia nono magipa dikdari ka'chaa na'a." Angaba uina sike, "Mai onga ?" ine sing'aha. Segipa agana sikbrejaoba angni sing'ani gimin, pilsaba angko an'tangtangni galchipa gita dakani gimin agandrana nanga gita dakaha. "Nono magipara matcha pila; uni ripengskarang re'bae chingni demechik saksamangmangkon biea. Una jegrikesa nangkode ruute galchipa gita dakaijok. Indakeming chingni wak jilgipakon on'atsrangaiaha," ine ua aganaha. Angni rochakenggipa nokni noksam nokgilrangoni bilone a'kongchipakni wakko chike buringchina balangakode angaba knarikaha.

Un attamode angaba uamangni noko tuaha aro pring seng'ahaon songtangchina re'pilna an'on jikgipa angni rama chel'ako re'pilna nangani gimin, angni skoo an'tangan kotip kaate watataha. Uani miksongania angko altue uina man'e an'tangni matcha ripengskaranganiko angko champengnasa dakaha ine ua Aganaha, enia ua kotipko rama re'anga gimikon oke galjachinaba aganataha, enia anga an'tangba bini aganata gita daken maming a'sel grian sokangaha.



#### Serikkot Ming 25:

### **MALSENG TEGITE SANGMA – KRISTONI A'SEL JANGGITANGKO ON'GIPA.**

*Agangipa : F.W. Harding, D.D.*

Mondolini bitchria siaona kingking Jisu Kristoko ku'rachakgiparangni rugalgimin an'chian ong'a. Kristian mondolini ong'chengantal da'ona kingking Kristoo bebera'giparangni saoba saoba janggitangna bate Jisu Kristona ka'sabatahani gimin janggitangko on'na tang'pilja. Indakgiparangni gisepo Malseng Tegite Sangma saksa ong'a. Jisu Kristoni a'sel an'tangni janggiko on'aniara Batabari Mondolini nabaani bitchri ong'achim. Malsengni itihasni kattara batabari mondolini nabachengani baksa gimaatna ampilgija nangrima.

Malseng ruuta bilsirangna kingking ia a'gilsako Jisu Kristona dangdike on'ani cholko man'jachim. Uni uiani, changani enia gisik gnangani bang'bea ba mingsinggipa ong'achim. Indiba A'chik A'songo, Kristian mondoli donga dipet bini ja'mangipa Kristianskarang bini dakaniko pangnaba gualna manjawa. Maina jean dal'a ong'a ine Jisu jekon agana ugitan Malseng uko dakahaua janggitangko ripinggipa

ong'jachim, ua uko gimaatskaha maikai bini bobilrang Kristoo janggiko man'skagen.

Malseng Turaoni mel chi'gittam chel'gipa Matchrugiri songo atchiaha. Bini ma'a-pa enia ua songo donggipa pilakan songsarek ong'tokachim. Indiba Malseng Mission chatrorangni Tura sepangogipa agalo ba Tura antio Nama Kattako aganprakako knaeming gisiknangatako man'e Kristian toromko ra'na sikahachim. Bini pagipa iako knae namen ka'onangbee Malsengni Kristoo bebera'aniko champengna gita biko bilonge dokaha. Salgipinoba biko buduchi rake kae donkuaha.

Malseng bilsu chi'dok on'titi batoa bia ma'a-pana uiatgija sriksrik Matchugiri songona Okkaparachina katange, uno Mission Lower Primary Schoolo poraie, Kristoo katnape napolataman'aha. Lower Primary Leaving Certificateko man'oa bia Turao donggipa Mission Middle English Schoolo poraianguaha, Dr. Philips sahebni bario malini kamko ka'e skulo poraimitingo bia an'tangko alduaha. Bia malini kamko bimchipe, bebedake, simsake dakahani gimin Phillips sahebni mittakako man'aha. Bini skulo poraimitingo bini ma'a-pani ka'onanga tipangenba, bisong detangna ka'saako mesokna a'bachengaha. Bin baksa porairimgipa Jillepsing changsao angna indine aganaha, "Anga Malsengning Matchrugiri songchina re'angon Malsengni ma'gipa pagipasong chingko sakgniko namen ka'sabee nokchaksoaha."

1913 bilsio Malseng Turao Mission Middle English Schoolko matchotaha. Bia Mission Skulni skigipani kamko ka'na ine angu dorgasto galaha, maina unomiting songni skulrangko nirokani enia chalaiani angni jako ong'achim. Unsalo Menggopara songo gital skigipako nangengachim. Bosin Master uno bilsignina kamko ka'ahachim. Uni uno kamko kamitingo ong'chenggipa Kristianrang sakgittam, chongmotan Nokma Wanjingni jikgipa Jangse baksa Ganjangming Sanjing ong'katachim. Indiba ua jolo masterni kam unomiting neng'gnigipa rakgnigipa kam ong'chongmotachim. Ua sakgittamna agre ua jolgimiko unomiting sakgipin Kristian ripeng saksaba grichim. Indiba andalgipa biap ong'srangoba uchina re'na Malseng jechakjachim. Uchina Isol antangko okamenga ine Malseng bebera'aha, Isolni okamako manina nanga ine uiaha. 1913 bilsini March jao Malseng Menggopara songo skigipa panditni kamko ka'na a'bachengaha.

Menggopara songo bini kam ka'chengaoni ruutgija Kristoni toromni bobilrang chanpengna jotton ka'na a'bachengaha. Malsengni skulo chatri sakgni Kristoo bebera'aha. Uamang Serin Me'apani demechik Jengme

minggipaming Insang Me'apani demechik Sengme ong'achim. Saksa mande Gannang jikgitena Sengmeko enia sakgipin Megan minggipa Jengmeko kimna sikachim. Ua mechikrang Kristianrang ong'ani gimin uamang ia manderangni jikgiterang ong'na sikjachim. Ua mechikrangko ka'mikkenate kimdrana joton ka'na a'bachengon, Malseng ia mechik sakgniko Turaona bakbak rimbaha maikai Turao uamang dakchakako man'na amgen. Uamangni Menggoparaoni re'chakatako knae Gannang ka'onangbee rangsan jako atte ra'e, ramao uamangko srapode uamangko dengan ine ku'chinge uamangko Turaona rikbaaha. Ua uamangko Turaona rikbaaha. Ua uamangko srapajok. Uamang Turaona sokbachengaha. Angona Malseng ua mechik sakgniko rimbah anga bini jako chitiko see uamangko Colonel Halliday, Deputy Commissioner-ona watataha. Ua mechikrang jakgitel ong'a, Gannangba Meganba uamangko jikgite kimdrana man'jawa ine Deputy Commissioner, Colonel Halliday hukumko on'aha. Unomiting Ganang Turaona sokbaha. Uaba chingni bangaloota re'bae, ua ka'onangbeahaoba, uamang sakgittamko dene so'otna mangsongsrang rikbahaoba, indiba da'o bini ka'onanga tipsrangniba, enia ua mechikrangni ba Malsengni kosako maming bolbil daktaijawaha ine Gannang angna ku'rachakaha. Uamang pilakan ripeng ong'rimenga gita Menggoparaona re'angpilaha. Anga kenchakani grisrangchim. Indiba angni kenchakani grian japang kimkim ong'jachim ine ong'bagnirang ja'mano mesokaha.

Adita anti re'angmano Malseng saksan Menggoparaoni Turaona katbapilaitaiaha. Ua janggitangko jokatna katbaha ine uiaha. Gannang ka'onangtaie Malsengko so'otgen ine songni manderangna gangbinge agantaitaiengachim. An'tangan ua songo donganguode so'otchongmotgen ine Malseng an'tangan kenchakbeani gimin ua Turaona katbapilaitaiaha, "Mai kagen," ine ua angna aganaha. Chinga sakgni iani gimin agangrikaha. Bon'kamao anga Malsengna agane inaha, "Menggoparaona re'angtaibo ine anga aganna sikjawachim, indiba na'a an'tangan iani gimin name chanchisrangkubo, nangni dakna nangni gimin bi'anio Isolni namnikako am'e uina jotton ka'bo. Unikoa nangni gisiktango Menggoparaona re'angpilna Isol nangko okamenga ine na'a uichongmotode, indide kenani gri, Isolo kadongsrange re'angpile, Menggoparao Jisu Kristoni a'sel chakchikna nanggnirang pilakon je ong'gniba ong'chong na'a chakchiksranggen ine anga ka'donga." Salgnini ja'mano Malseng angona re'bae aganaha, "Anga Isolo bienba Ua angna an'tangni namnikaniko mesokaha. Menggoparachi re'angpilna Isolni namnika ong'ani gimin anga re'angpilna miksongenga." Uni gimin

Menggoparao Jisu Kristoni a'sel je duk ba suk mikkangchi bina dongsoenga uko Jisu Kristoni bilchiming ka'saachi chakchiksrangna miksonge, salgipino Malseng Menggoparaona re'angpilaha. Ian 1913 bilsio ong'aha.

Sinkario memsahebming anga wenmitingo Menggoparao waltuaha. Malseng noktango chingko nokchakaha. Unwalo bini nokni barandao chinga sakgni Malsengming gopo ka'on Malseng angna bini kenchakanirangko Parakatsrangaha. Gannang tomtom ong'ja, angni kosako bobil dakengpiti, angko so'otgen ine anga kenchaka ine Malseng chingna aganaha. Bon'kamao bia anggo indine agane singaha, "Anga Menggopara songo ruutgijan sioba, anga sae sioba ba maiba uisogija a'sel ong'e sioba, angni siako sandisrangna na'a ku'rachakgenma?" "Sandigen," ine anga ku'rachakaha. Indiba indakgipa a'sel maming saloba sokbachongmotjawa ine anga gisiktango bebera'chongmotachim. Pringo chinga Malsengko jako rim're "Good-bye" ine inmano Menggopara songko wataha. Ua sal intal chinga Malsengko grongtaijaha-bini soenggipa manggisikosan nikariaha. Salgio donggipa bebera'ao chesranggiparang baksa kamko ka'pana enia Isolko mikkang chake uisrangna Isol uko okamman'ahachim.

1914 bilsii, February jani gnigipa antio anga angni noko donggipa officeo kamko ka'engmitingo ka'tapo ka'tapo rang'site Menggoparaoni manderang sokbaaha. "Malsengni manggisiko ripebaenga," ine uamang aganaha. Ua maikai siaha ine uamango sing'oa uamang aganchake inaha, "Sikar ka'na re'angmitingo a'bani nokni barandao asongon meseni nokchipak katbaako nika uko slaini kundachi dokna dakon slai riptmane chelo guli nange rang'san siaha."

Anga Menggoparao dongmitingo Malsengna angni ku'rachakako gisikra'aha. Colonel Halliday Deputy Commissioner ong'achim, indiba bini dongjamitingo Dr. Munrowd, Civil Surgeon Deputy Commissionerni kamko ra'skaengachim. Dr. Munrowd angni ripeng ong'ani gimin rangsan anga una chitiko see Malsengni siani gimin angni kenchakanirangko parakataha. Civil Surgeon ja'mano sechakaha, "Babu doctorrang manggisiko porika ra'e, Menggopara songni manderangni kattani sakkiko mangrakataha, indiba angni kenchakani gimin ua bakbak policerangko sandichina Menggoparachi watatna mangsongenga." Uandake ua policerangko bakbak watataha. Indiba policerang Menggoparaona sokangna skang sandisona aro dakchaksona gita, anga saoba changgipa kakketgipa ja'raggipa manderangko watatsoode, nambatgen ine anga



chanchie, procharok sakgniko Menggopara songona watatsoaha. Ua procharokrangni gisepo saksa Rev. Jengno Areng ong'achim.

Sorkari hospitalo doctorrang Malseng sagini manggisiko porikka ra'enba aganaha, "Gulirang chelni ka'mao nape kosakchina napjoljolangaha." Ian songni katta baksa melienga gita nikaha, maina slai goon srongsrong ong'nasipile dongengachim ine uamang aganahani gimin, gulirangni rama indaken ong'genchim.

Indiba ia report angni kenchakanirangko gimaatjaha. Uni gimin Dr. Crozier sahebba Malsengni manggisiko gopramo gopnasion bini be'eno ua gulini ramako sanditaiaha. Porikkako ra'na gita ua wasri ro'kalako pari tongtong sikjoljolatha. Chelni ka'maoni kosakona ua gulirangni rama ong'ja indiba tongtong ua guli rama re'aha ine chinga sakgnian nikchongmotaha. Menggopara songni manderang tol'aha aro babu doctorrangni gisepo saoba gualaha ba simsakgija dake ua manggisiko porikka ra'aha ine chinga uisrangaha. Indiba Isol iako talatsrange iani gimin bebeko bon'kamao ong'akatatsranggen ine chinga ka'dongsrangaha.

Chingni ka'dongsoa gita ong'bachongmotaha. Rev. Jengnomang tarake re'e policerangna skang Menggoparaona sokeaha. Uamang rang'san sandina a'bachengaha. Unikoa Gannangni jikgipa, setang Gannangan Malsengko so'otaha ine uamangna ku'rachakaha. Iako knae Gannang ka'onange aganaha, "Jikgipa nampnike dakjaode maichi jokgen?" Unon ua an'tangni namgija kamko ua procharok sakgninan ku'rachaksrangaha. Policerang sokbaon uamang Gannangko rim'aha. Ja'mano ua bichal ka'ako man'e pasi on'ako man'aha.

Malsengni siani gimin Gannang indine kattako aganaha, "Anga pilnipil Malsengko so'otna mangsongsrangaha. Antini pringsao ua namgija kamko chu'sokatna gita anga songoni antiona re'gipa ramani sambao gin'cheng grimo jako slai gnang anga timsoaha. Malseng antichi re'on ua rama gita re'gen ine chanchie repakmitingo uko anga gona mangsongaha. Indiba Malseng antichi re'angahaoba ua ramako re'gjija gipin ramako re'angskaha.

Jeba ong'chong Malsengko so'otna Gannangni skako uandake champengachi namen bilongbataha. Ua salon uko chusokatsrangna sikahachim. Uni gimin ua gipin cholko dakaha. Ua Malsengni Kristian ong'e ka'sasranggipa ong'aniko Malsengko so'otani cholko jakkalna mangsongaha. Attamchibara Gannang cha'chipile bilonge saa dakmikaha. Ua noktango tue, antangko kombolchi pindape, ua kombolni ningo

an'tangni slaiko donnuaha. Unikoa maiba cholchi ua an'tangni bilonge saani gimin Malsengna uiataniko dakaha. Ua uiachim, Malseng indigitan namgipa Kristian ong'ani gimin uni bobil saengoba ua bobilko dakchakna re'banaba gnang. Uni ka'saao pangchake uko so'otna mangsongaha.

Gannangni chanchisao gita ong'bebeaha. Unwalo Malseng rokom rokom samko ra'e Gannangni nokona re'ange sokangahaon sam on'na re'baaha ine ua una aganaha. Cha'chipile saa dakmikgipa Gannangni ja'chokchipak Malseng morao asonge sanna mangsongaha. Unikoa Malseng an'tangni skoko gipinchipak an'pilmitingo uni nikgijao Gannang sriksrik slaiko kombolni ning'oniko saloke, name nisan ka'na somoiko ra'gija, rang'san Malsengko chelo goaha. Uandake Gannang Malsengna uni ka'saani groko chotaha, danang ! Uandake bobilna ka'saako mesokon chong'motgipa Kristian mande Malseng siaha. Undake Menggoparao jeni ka'tongo bobilna mitchinikani biapko man'ja, Jisu Kristona ka'sasranggipa, Uni a'sel chakchiksranggipa, an'tangni bebera'anina uni an'chitangko on'anichi sakkiko on'aha.

Malseng ong'gramaie sijaha. Je kamko ua a'bachengaha sakgipinrang Isolni pattianiko man'anichi ka'anguaha. Kristian toromni je bitchriko an'chichi sataha, ruutmano bite nangbebeaha. Aditani ja'mano Menggoparao donggipa Kristianrang mel bri chel'a biapo, Batabari minggipaona, katangaha. Bilsio 1911 oni 1931 ona uamang Tura Mondolini bipek ong'achim, Indiba 1931 bilsio Batabari brienba ja'tangchi re'na sike, Tura Mondoli uamangko katchae wataha. Un bilsio Batabari song ma'mong mondoli ong'baha. Ma'mong mondoli ong'bachengani salo uamangni memberrang sak 148 ong'achim, dasikario uamangni memberrang sak 297 ong'achim. Ma'mong ong'chengantal da'sikariona kingking Batabari mondoliona sak 115 ko napolatachi chapataha. Da'sikario mande sak 8 san napolatako man'aiaha. 1931-oni 1939 ona bilsisakibba indake banggijasrang napolatako man'-kujachim. 1936 bilsio sak 27 napolatako man'aha. Da'sikario Tura Mondolini demechik Batabari Mondolini bipekrang dam 8 ong'achim. Mamong aro bipekrangni Sunday Skulrang ge 4, aro Sunday skulo poraigiparangming skigiparang sak 216 ong'achim. Ua mondolini Lower Primary Skulrang ge 5, chongmotan Governmentni ge 4, private ge 1. Skulo poraigipa gimikgimang sak 118. Skul nokrang te 4 ming gilja nokrang te 6. Da'sikario uamangni on'anirang gimikgimang Rs. 81-15-0 ong'achim.

Ua me'chik sakgni, jerangko Gannang aro Megan jikgite kimna am'achim, jamano Jengmeko Jillepsing procharok kimaha, sangmeko

lingsan pamong kimaha.

Uandake an'chinga nika, Malseng skiako man'algipa ong'jaoba ua Middle English Certificateko man'aeahaoba, bilsisanasan Isolna Menggoparao kamkoka'na am'aiahaoba, uni nama cholonara, uni mandeskarangna ka'saniara, uni sijana kingking Jisu Kristona hakchikaniara, janggitangko on'chakna nanggen ine uisooba uko on'na uni tangpilgijaniara, duk ong'bo, suk ong'bo Jisu Kristoo ka'dongsrange na mikkangchi tongtong re'e, Isolni namnikako dakna jotton ka'e an'tangni kamko chusokatsranganiara gualna ampilgijagipa gisikra'ataniko ong'ataha-chongmotan Batabari Mondoli.

Da'ororo Malseng gita Jisu Kristoko unbaksa ja'riksrange Kristian panterangoni saksa tang'pilgijagipa ong'a ?

☆☆☆☆☆☆☆☆

Serikkot Ming 26:

DO'BRETBA AGANA : "MATI ODAI 24 : POD 44"

*Agangipa : Bankim Koksi Sangma, Nishangram.*

A'chik A'songni salgroo ua song songba dal'a, mandeba jela, pangkamgipa song; mondoliba dal'a, an'ba an'saoa. Ua songon saksa me'apa mondolini a'palo donako man'e dongengachim. Bilsa bri, bilsa bonga ong'angpiljok ua me'apa songsarekba ong'srangja, Kristianba ongsrangja; Isolkoba Isol mingja, mandekoba mande mingja dake janggitangengachim. Neng'takani salrangoba basakoba pringo chekke pal'tak ra'e, koksi te'rak kee, ge'a donggerangoniko na'tik kitrongachim, ge'a pattalrangoniko ang'ke am'rongachim. Basakoba attamangachibara slai de'e bringre'amna songoni onkatangrongachim.

Salsao Robibal salo attamangachibara buring damsao marakka chirori bite cha'ako timna ine ua slai kepdaiko ra'e songoni re'ongkatangaha. Marakka chirori cha'ram buring songoni adita chel'achim. Ua ua biapona sokangon marakka chirori bite cha'ani a'dam minako nikaaha. Ua chirori bolni sepang jolo cha'gipa bolrangko nion, pekkam gamra pekawatgipa, bijak adita bijimgipa bol pangsako nikaha. Ua bolon ua mande gadoe, bolcheksirangko pe'chambake suk ong'e asonge timsoaha.

Attam salnapna sal adita chuengachim; do'orang mikoa, balwa

balsri bala ka'srisrichim; marakka timgipa gisikseng'e timsoengachim. Tima adita ruutjok. Bini asonge timgipa bolkosak cheksio do'bret ka'bak gipokgipa manggni bachiniba bilbae cheksi dingtang dingtango ba'ejok. Ia do'bret manggnini mikoara ia marakka chirori cha'ako timenggipa mandeni nachikkolnade indinesa knaachim : Do'bret mangsa aganaha (mikoaha) : Mati odai 24 "manggipin tapan aganjok : Pod 44". Ua mande name name gisiknange knatimoba binade mangsani skanggipa mikoako "Mati odai 24," manggipinni tap mikoako "pod 44" inesan knaiachim.

Do'bretrangni agana katta : "Mati odai 24, pod 44" ingipako knaon ua mande gisik suk ong'jajok. Ian Kristianrangni Sastroni bak, do'bretrangchiba Nokgipaan gisikpil'chinaan, mondolio nappilchinan binan aganchong'motaha ine ua mande bakbakan boloni ong'one nokchina re'bapilaha. Skango gada bimako balaamna Jihovani ku'aganatako ua gisikra'ataha. (Chanani odai 22)

Nokona soke, slaiko bak done, Sastro Mati odai 24, pod 44-ko oprakgalgale nioa indine seako ua nikaha : "UNIGIMIN NA'SIMANGBA TARIE DONGBO ? MAINA NA'SIMANGNI CHANCHISOGIJAN SALO MANDENI DEPANTE RE'BAA." Ian biko gisikpil'chinan mikrakatchong'motjok ine ua gisiknangaha. Ja'mano gisikpil'e ua mondolio nappilaha.



### **Serikkot Ming 27:**

#### **ME'MANGNI GRO CHOTA.**

*(A'chik Ku'rango Kosan G. Momin-ni segipa)*

Song damsao saksa kangal indiba toromigipa mande dongachim. Uo mandeskana kasachakani gun bang'a aro ua kakketgipa mande ong'achim. Depante saksana agre uo pilakba grichim. Uni sian salo depantegipa mangrepake pagipani, nitobegipa aro an'sengbegipa biap damsana sokangako nikaha. Pagipa ua mikjumango saksa nitobegipa me'chik bi'sako rimbae una aganaha, "Nibo, dede na'a angbaksa dongmiting salrango pilak angni daka kamrangko nika aro uia. Ua salrango na'a angna maming duk mangni aro ka'tong saataniko dakkujaha, ugitan na'a nangni pilak songsulrangnaba dakbo, pilakkoba onia daknabe. Nibo anga nang'na ia me'chikko jik on'aha. Unbaksa tom'tome nang'ni

pilak janggini salrangko re'atbo, aro angni ge'etanirangko manibo. Ong'jaode na'a duk man'gen aro ia bi'apona sokbae angko grongtaina man'jawa.

Depante pagipani siani ja'mano ma'drang bakska dongpajani gimin baksan ong'e, songo noko dongpanaba suk ong'nikjaha. Unigimin pani je on'tisa donga pilakkon pale song chel'achi brangna mangsongaha. Ua re'angaha, re'angen re'angen bang'a song, pattal aro buring rangko batangaha, aro salsagipao a'bimanduko baton walchangaha, unbaksaba mikka wabeani gimin badiaba biapo jamdap te'sao saksan tuna nangaha. Un walo mikka wamano jajong teng'beachim. Ua waljatchio mikrake ua buringo mande ku'rang aro a'a cho'enga gita gam'ako knae sawa maiko dakenga ine nina re'angoa, beben mande sakgittam a'a cho'engako nikaha. Ua uamango sing'on, uamang indine aganaha, "Chinga saksa mande bang'en gro nange sigipa papini gopramko bilenga. Ia mande gopako man'na kraja, peru aro do'reng, do'karangsa bini be'enko cha'china. Maina bia chingna bang'bea tangkarangko chotanggija siaha." Mande simanahaoba bini manggisiko indake ka'saninggija dakara kraani ong'ja ine chanchie ua duk man'chakaha. Ua uamangna indinde aganaha, "O ripengrang, anga na'songko mol'mola, ka'sapae bini manggisiko bilpanabe, angko je gnang pilakkon ra'e uko kema watsrangbo." Unon uamang sing'aha, "Nango badita donga ?" Ua aganachakaha, "Tangka ritchasasan." Da'ororoni salo man'gijasrangana bate on'tisa man'pakuan nambata ine uamang chanchie aro tangkako chane ra'e, gopramko name dappilenba, da'alde baoniba jarako grongaha ine agangrike kusi ong'e re'angaha.

Uaba salgipino chakate uoni songre'angtaiaha. Re'angen re'angen ditubegipa buring a'bimanduko re'mitingo ua mande saksako grongaha. Ua mandeoba mamingba gri, ua jolonggako kearisa re'engachim. Uamang sakgnian nangrime, agangrike, katchae re'angen song damsasna soknasio, aro ramao asonge nengtakmiting buchuma saksa adita bite aro maiba jadilrangko katome, bu'su aro totengarigipa on'tisa am'bolko ra'e re'baengako nikaha. Buchuma mande a'gittal songregiparangko miksonge nie re'baen re'baen ja'gitote gitilenba ja'a be'srangaha, aro chakatna amgija romromari grapaha. Uko nikenba pante ka'sachake buchumako nokona ba'tomangna am'aha. Indiba re'pagipa an'tang jolonggaoniko sam timiko bikote be'gimin ja'o nongatoa rang'san jorapil'aha aro buchumba me'tra pil'srangaha. Re'pagipa mande samni dam ine buchumao bu'suarigipa am'bolko teng'gittam bi'e ra'aha. Unoni re'angtaie gipin songjinma damsasna sokangoa 'Putulika gahon' ka'giparangni ka'ako nipana

re'angaha. Uamangni nimitingo rani dakgipa putulko achak katpake be'ataha. Re'pagipa mande unaba apsan timioni samko nongateon be'giminrang rang'san joratokpilaha aro kilding salatna nanggija an'tangan chrokaha. Unon gahonirang samni gunko nike an'tangtangni pilak putulrango nongattokchina mol'molbeaha aro walsao man'a gimikko on'na kurachakaha. Ua nongatoa pilak putulrang an'tangtangan chrokanngtokaha. Ua samni damko tangkani pal tonual mangsako bi'e ra'aha. Salgipino unoni re'angtaie chibima dilsani rikamo neng'takmitingo salgichini mainiba mikoako knaana nigitooa rajahas gisim aro gipok manggnini bilrorengako nikaha. Uarang ka'sne tang'onrorobae uamangni asonga biap sepango ga'akeoa re'pagipa mande ua gisim aro gipok manggnini grang geprakko tonualchi rasote ra'aha. Ia re'pagipa mandeni uarangko ra'ani mangsongako pantede mamingba uipajachim; sing'paoba basakoba mainaba nangnaba gnang inesan aganaiahachim. Unoni adita salna kingking re'angen re'angen uamang rajani dongram songjinma damsaoana sokeon ia rajani nitobegipa demechikni gimin kattarangko knaaha.

Ua me'chik an'tangko kimna seksekgipa panterango "Da'o angara maiko chanchienga ?" ine changgitamna kingking sing'aniko sing'na dona gnangchim? aro uko tik aganna amgijagipa pante sakantiko so'ote galrongachim. Ia songregipa panteba ua me'chikko nikoa mikchabeaha, aro skango sibokmitingo pagipani rimbae mesokgipa me'chik ine uie uni gisiko chanchiako minge nipana mangsongaha.

Me'chikni pagipa an'tang demechikni namgija gisik aro so'otani kattarangko aganoa panteni sika aro sina kengija mangsongako nike salko manchiataha.

Re'rimpagipa mande panteni tusimiting waljatchio ua me'chik maidakgipa mancha nina rajani nokchi re'angaha, aro noksamo sriksrik time dongmitingo me'tra kelkiko oe diltugipa a'bimanduni a'bri dotsaona bilangengako nikaha. Ua mande ong'e maikai bila aro maiko daknasienga, jarikange nioa andalgipa a'kolrangko batangman'o montol dakgiparangni pamong baksa uni roengako nikeaha. Re'bapilnasion me'tra pamongna agane inaha, "Da'oba angko kimna mangsonggipa pante saksa re'bataiaha. Uo anga mai singaniko sing'gen?" Pamong aganaaha, "Manderang maikoba chanchie uigenode, na'a nang'ni juta jorasako chanchie sing'aibo." Pil'bapilon me'trako duk on'na gita mikka balwa ta'rakan baksana am'bol tottengarigipachi ua dokrorobaaha. Indiba me'tra nikjae aro uijae stil ondapasa ine chanchiaiaha. Sal kapa sokon rajani dorbaro me'tra ua panteo chanchiatangko sing'on, na'a an'tangni juta jorasako chanchienga

inc panteni aganchakana aiao inmane aro jinmani mikkango kratchae ku'simsimtektek dakaiaha. Unikoa anga nang'o sal gipin gipin changgni sing'taikugen'ine me'tra pantena aganataha. Walgipinoba ua re'bagipa mande me'trako jarikange Montol Pamongni kupatiatako knatimeaha. Montol pamong sing'aha, "Ua mande tik aganchakna man'ama?" Me'tra aganchakaha, "Oe maibakaie tiktak aganchakaha," Montol Pamong aganaha, "Aicha, pilakba kragija aro altubegiparangko chanchijawa. Da'anpakode na'a nangni jakni muja jorasako chanchie sing'aibo, man'jaode un skoko sote, mikgron ronggnikon ote angna cha'na ra'basrangbo." Uoni pil'bapilon ua me'trako bilgriatna am'bol totengarigipachi dokbataiaha. Salgipino rajani dorbaro singtaioa da'alba ua tik aganchaktaiaiko knaarin me'trani bimang an'chi-minsu gri bokdelgaggap ong'e kena napaha. Gittamgipa waloba re'rimgipa mande knatimna ja'rikangtaiaha. Indiba un walo ua biapo mamingkoba agangija ma'manti tamasa dake aro chrokmesae salko re'ataiaha. Re'bapilon Montol Pamong me'tra baksa re'bapaha. Re'banitingo mande uamangni gisepo donge sakgnikon am'bol ja'gittamchi dokrorobabeaha. Indiba uamang mikka balwa aro stil bilongbeaha inesan uiaiaha. Rajani nokona sokon Monto Pamong me'trana 'da'anpakde angni skoko chanchibo' ine ku'misichi agane pil'angna an'pilon ua mande biko knio rim'e rang'san tonualchi gitoko sotaha aro bimangko gipin biapchi ra'ange skoko rumalo katome ra'aha. Pringo ripengna on'e ua aganaha, "Da'alde na'a ia katomko ra'e dorbarona re'angbo, aro me'trani an'tang chanchiako sing'on iako engprake mesokataibo." Pante ripengtangni agana gitan katomko ra'e dorbarona re'baaha, aro me'tra sing'on, "Na'a iakosa chanchienga" ine katomko enge mesokaton mande jinma ua an'chi cholcholenggipa mande skona jagokaha. Aro me'tra ku'gri ong'e bolritchong gita chadengariaha. Ja'mano panteko ua olakkie aganaha, "Na'an angni segipa chongmot." Unon rajachina an'pilange ua inaha, "Ia pante katchinikgipa aro gisik gnanggipa ong'a; uni gimin O appa, na'a iakon angna bia ka'e on'boaha." Pagipa raja una uko bia ka'e onaha beben, indiba ua me'tra kusi ong'gija pring attam ku'bososo dake dongbokrongaiachim. Pante ia kattako ripengtangna aganoa, ua rajahasni grang ponggniko on'e inaha, "Skang ia grang gisimchi, unikoa bakan gipokchi chio sim'e, bini mikkango satkikidapbo, unon ua gisik pile namsranggipa ong'gen." Bini agana gita dakon, ua me'chik an'tangni daka pilak kamrangko gualsrangaha. Aro mikkang dingtang ong'e, nitobatsranggipa, katchaan gaggipa aro sena ka'sagipa ong'aha.

Salgipino bini ripengtang biona re'bae bina indine aganaha, Ripeng.

anga angni nang'na dakna nanga gimikkon matchotaha, angni gro dongjaha. Ka'sapae angni re'gniona re'angna angko watpabo; na'ade ianon tomtome dongbo. Ua pante ripengtangni aganani mangsongako uijaha. Ua an'tang baksa dongpachina pil'nipil molmoloa, ripengtang an'tangko parake indine agansrangaha, "Nang baksa dongpana angara mande ong'ja. Skango anga saksa mandena bang'en gro nanga uko chotna amgija siahachim. Angni manggisiko nang mikkangon bilahachim indiba na'a ka'sachake an'tangni je gnangko uamangna chotaha. Ua mandeni ME'MANG angan. Basakoba nang'na dakchakskana nanggen inesa indita salna nangbaksa dongpaaha." Iako agane ua mikkangon gimaangaha, aro uko mamingsaloba niktaijaha.



### Serikkot Ming 28:

## **ONG'RONGGIJA ONG'ANI : JA'SAMBRI JAKSAMBRI ATCHIGIPA MANDE.**

*Nike Agangipa : Lemson Ch. Marak, Tura*

Salaram Pakistano an'tangtangraragrik dakgrik dinggrikon a'songni songdonggipa lakni lak manderang janggitangtangna kene Indiaona katnapbatokaha. Ua katnapbagiparangoni Muslim nokdangsa Fozul Huq aro bini jikgipa Rahela Khatoon, Meghalayani A'chik A'songo katnape Patejora A'tipo dongnapeaha. (Patejora A'tipara Mahandraganj Ramao, P.O. Zikzak, Garo Hills) Ia nokdangsa Mymensingh Districto donggipa Thana Sribardini Palastolla minggipa songoni ong'achim. Patejora A'tipo dongengon 1971 bilsini October jani 6 gipa tarik budbar salni pring 4 bajio Rahela Khatoon bisa saksako an'pakaha. Ia bisara me'abisa, mandebewal ong'bewal ja'samgni, jaksamgni gnangan baksanaba, gipin ja'samgni, jaksamgni gnange, gimik ja'a sambri, jaka sambri ong'e atchiaha.

Ia ja'a samgni, jak samgni chategipa daktegipa matbringna ja'sambrichi re'china Babrani dakata gitan ia bisani ja'a samgnia gandil ka'ma samtangtango ja'a chaa; jak samgnia pakkol samtangtango ka'bako jak chaa. Ia bisa gipia bisarang gitan ma'ani sokko taraken cha'na man'a aro tangenga. Ia ong'ronggija bisako an'pakna ma'gipa samitingo uko an'nina sorkari an'rigipa nurse-rangko sakbri iamang, Tra Liansimi Sailo, Tra Lina Marak, Tra Sulekha Sangma aro Ma. Rashmoni Sangma



dongpaha.

Ia ong'ronggija bisa atchigipa sal 21 tange siaha.



Serikkot Ming 29:

JOE LOUIS

*Chimonggipa : Jarongpang Rongmuthu, Tura.*

A'gilsakgimiko ruuta bilsirangna kingking jokjokakalsu sao (boxing) biltingting jaktingtingchi su'tingting su'chichi su'pakpakgrike dakgrikao Americao saksa Negroko a'gilsakni darangba amna man'jachim. Bini ra'biako ra'chakgipa pilakkon biade amattokaichim. Ua negroko joe Louis minga. Ia mande A'gilsak gimikni Gnigipa Dal'gipa Dakgrikao sipaio napani ja'mano dakgrika bon'o ua jokjokakal'ao naptaijaha, indiba bia jokjokakal'susao bilongen tangka man'bejok. Ua tangka man'achi a'a damsako biga hajalsa richabonga ong'gipako breaha. Ua a'bao nok te'sa dongachim aro ua noko saheb buchuma budepa jiksesa dongachim.

Salsao ua an'tangni bregimin a'bako nina gureo gakate re'angaha. Ian bini bregimin a'bachu skanggipa re'angchengani. Ua a'bao nok te'sa donggipakoara a'bani noksik damsao rikachim. Ua nokchi mikkange ua re'angengachim; ua nokba da'ode bininjok. Nokona sokangon ua dogako kasne doktiktikaha. Unon saheb budepa dogako oaha saheb buchumaba dogacholona re'baha.


"Na'a maiko nanga?" ine saheb budepa rang'tinge sing'aha.

"Salnam," ine Joe salamaha. "Anga re'pakbaengasa, enia...." Agana matchotsrapgijan ua saheb aganaha, "Atcha re'pakangbo."

Joe duk ongaha. "Maiba a'sel ong'ama ? ine Joe sing'aha. "Oe, maiba a'selde ong'jok. Ia biapko saoba Negro brejok."

Joe jajajiji dakaha. Ua dikdiksana chanchie indine aganaha, "Anga nangna katta ra'bara. Ia a'bako bregipa mandeko anga uia. Na'song ia a'baon, ia nokon skangoni jedake dongbaenga uandaken sia sijana kingking dongangaichina na'songna aganchina angko bia watataha. Na'song dongchakani nokni barakoba on'na nangjawa, mamingchiba na'songko jajrengatjawa." Indine agane ua gureo dabrangaha.

Mairongpile kasachakgipa ka'tong. Joe Louis da'oba tangenga. Ua pangan Sastro poraironga. Kristianni ka'tongsan mangmang rang'san chanchigitike mandeskani ka'tongko saknaatgijani kattarangko rang'gitik aganna man'a.



Serikkot Ming 30:

**ME'MANG CHROKA.**

*Agangipa : Rev. Gilbert K. Marak.*

1956 bils, sin'kari ga'dapnangnang November jasinapangachibara anga Khasi Hillso donggipa chel'batsranggipa A'chik song Songading minggipa songchi roangaha. Ua song chonbea, song a'tete, pilakchin a'chura bolgrim, chiring ka'sin'jrim'jrim, sikdikdikbegipa biap ong'a. Ua songo nokking nokchisa mangmang donga. A'gital manderangde salomangba kensiksak dongsiksakman'achim.

Attam salniange andalbaroroon kenanirangba nabaroroachim. Uan mongma songsam roram, matcha noksam wenram enia amak duru weram biap chongmot. Sal napa tarimean uno rokomari knaronggijagipa walni dedrangni jikjakako, a'dingako knae an'chijrim'jrim kengisika gnanng rosiksakmanachim.

Walo noksam nokgil andalsimsim seng'wat witwatwitwat, seng'jal jil'jal jil'jal bilwitwetengako, chiring ruru gam'ako do'mangganchi mikoako knae, sinsrik kensrik dake anga tusinapjapilengachim.

Unon mande jinma wekwak chekchak dakako knae anga enia angni ripengba kenbeachim. Songo maiba a'sel ong'ronggija ong'ahama ine chanchie anga chakataha, enia wa'al jako ra'e, jinmachina ong'katange, "Mai ong'a ?" ine sing'aton, "Me'mang chroka ! Me'mang chroka!" ine jinmachini aganchakattokaha.

Ia kattako knarion chinga kenjagoka gita dakpilaha; enia ta'rake jinmachi re'pinapangaha. Unon uamang gopranchiko mesoke knatimroroe indine aganaha, "Wakai! wakai! knatimbora! me'mang chroktokenga, mesatokenga."

Aiao! Bebejok! Maiko agankuna! Uamangni agana gitan, chiring nalsachi a'timbo goprannancha andalsisichi chengchang bengbang dama

dadinge, rang, kram doke, adil, bangsi sike, doro dereng sale, chrike, aboke me'mang jinma andalmin'dik, gripgrip-grip chrokmesatokbebetokengachim.

Chinga knatimbejok; re'e ninaba pa'chongmotjachim; uandaken manderang kentokbeahani gimin tusinapjapile, wal'tim chake me'mangrangni giminan golpo ka'e walsengattokaiaha. Gopramo me'mangrang walgimikan churinge chupeke chrokmesatokachim. Me'mangrangni doka-dam'a, chrokmesaani gam'arangkosan chinga knaejaha, indiba me'mang bisarangni grapa mumuarangkoba chinga ji'ja knaman'achim.

Wal seng'ban baksa uamangni chrokmesaani, doka-dam'ani, sika-moani ku'rangrangba siroroangachim. Sal nabasrangahaoara gisepo me'mang okamani enia rururara aganani ku'rangrangkosan knaangaiaha. Ja'mano salchuahaoara me'mangrang a'koltangtangchi nappilangahakon, ku'rangkoba knamanajajok.

Ian mingsa angni janggi tangao aiao inmananiko re'grongani ong'a! Angni gisiko me'mang dongja ine chanchioba manderangni aganronga gitan me'mang ingipara dongbebeama ine chanchimanpilaha. Indiba me'mang maidake donga enia mai chong'mot ong'a uina sikani gimin anga iani gimin bang'a manderango sing'beaha. Pilakba angna chu'ongnikgipa aganchakanirangko on'na man'jachim, enia manderang uan me'mang chroka ong'chongmota, enia me'manga donga inesa agantokaiachim.

Salsao anga Gauhati Universityni Vice-Chancellor Dr. H.J. Taylor baksa gopo ka'e roengachim. Unon maiba maibarangko gopo ka'en ka'en ia me'mang chrokani kattarangba ong'katangsrangaha. Anga ia pilak ong'anirangko aganon, ua namen kadingbeaha.

Uani gimin Dr. Taylor indine aganaha : "Uan me'mang chroka ong'jachim, indiba badiaba biapo, ong'naba donga mel chiking, chibonga ba sotbri dake chelgipa song biapo, banoba manderang churinge, chupeke, doke, dam'e chroktokenga, mesatokenga. Indiba ua gopram jolo banoba rong'kuchak, bolku'chak ba wa'kuchak (receiver) dongachim. Uano nangchake gam'a ku'rangsachim. Ua ku'rang ra'chakgipa gopramo dongani giminsa me'mang chrokenga inenba chanchie kenanisan ong'aia."



### **Serikkot Ming 31:**

#### **CHANGSAO DAKGRIKRAMA 'BAO KRISTMAS SALO.**

*Chimonggipa : Jarongpang Rongmuthu.*

1944 bilsì, Germany a'songo napen salang walang Americanrang Germanrangko ka'chi ka'chi dakgrikmiting. English enia American kotok gittit gittit pilakchin Germanrangko sikcheproroangmiting.

Germany a'songo Belgian simna sepangchi Ardennes buring bolgrimo chongipa nok te'sao German mechikma, bilsì chi'gni ong'gipa depante saksà, boma goe songnokrang ruronggiminoni kate dongengachim. Ia buring samtangtangchin chotchanggija dakgrikani slai, kaman, boma gam'anin, buring bolgrim kosakchi salgìo rurugol bilanin il'ilgimgim a'inma bikbo bikbo, chiinma jiljojiljo banggri kama gita dakaiachim.

December 24-gipa salni attam walsimsimao American sipai sakgittam kotoktangoni salgittamna kingking buringjoljol brange, rim'a man'na kene dongnujoljole, ua bolgrimo donggipa chongipa nokona soke dogà .doktiktikaha. Ia American sakgittamoni saksade ja'pingo guli nangako man'e an'chi ong'pokpoke namen bilgribee suri kosako tue dongengachim; sakgnigipara do'gachol sepango chadenge sengengachim. German mechikma bilsì chi'gni ong'gipa saksà depanteko rime dogà oon silni tupiko stikgipa sipaisakgni a'palo chadengako rang'san nikaha. Chadenge donggipa American sipai sakgnioni saksà ua German mechikmana, surio nomboke tue dongenggipa sipaichiko jaksì ote aganaha. Ua German mechikma ua American sipaini aganako on'timintiba uijaha, indiba ua uamanga American sipairang ong'a ine rang'sanan uiaha.

Ua German mechikma jripjrip il'engsiksakgija jaktangko depantetangni pakkreo gate adita chadenge nichaaha. Ua American sipai sakgni, silchidare donggipara, draen nokningchi napna man'genchim, indiba uamangba mikgronchi maiba dakchakaniko mol'molenga gita adita chadengchae dongaha. Surio tue dongenggipa mata-bua man'gipa saksà American sipaide sian sia il'engsiksakjajok. Ja'mankitiko ua mechikma nokningchi napbachina chin dakataha. Sipai sakgni an'tangtangni mata-bua man'gipa ripengko nokningchi de'napange ua German pante bilsì chigni ongkipani palangon tuataha.

American sipai sakgittamoni saksaba German ku'sikko aganna man'jachim. Indiba ua German mechikma French ku'sikchi sing'e nion, saksà alamala French ku'sikchi agangrikna man'a ine nikaha. Ua German mechikma ua mata-bua man'gipa American sipaiko nie sanaha : uni

jaksirang suri chiktotenga ine nikon depantetangko uarangko nol'ataha.

Ia American sipairangoni saksara kimjimjim dal'achim, uko Jim mingachim; saksara mangrorengreng changroachim; uko Robin mingachim. Ua guili nangako man'e tue dongenggipakoara Harry mingachim.

Ia German man'ningsao bisani pagipana Kristmasna sokbamangona ine jilsoa do'bipa mangsa dongachim. Ua do'bipakon dokkamkame ua Americanranga ua pante bisa song'engmitingo Jim song'a chanao lakchakpaengachim. German mechikmara Harryni matako katiptipna ba'rako chitdingdingengachim. Do'o jo'krapani smilchipchip kuturi gimik chipengon, cha'chakna mejko ua pante bisa andapengon, rang'gitik doga doktiktikako uamang knataiaha. Kotoktangoni branggipa American sipairangan ong'engnaba donga ine chanchie ua bisa dogako oon, German sipai sakbri, silchidare chu'soke ra'bit-ganbite chadengengakosa nikaha.

Ua German pante bisa namen kenbeaha. Ua pante bisasan ong'aioba, a'songni niam : bobilko nokchakani dal'begipa niam pe'ani. ong'a ine uiachim, enia bobilko nokchakgiparangkode rang'san goe galani ong'a ine ba uiachim. Ma'gipaba namen kenbeaha, indiba ua a'palona ong'one, ua uamangna indine ka'sine aganaha, "Kristmas Katchani Ong'china." Sipairangba bina "Kristmas Katchani Ong'china" ine inaha.

Ia sakbri German sipairangni dilgipa (corporal) indine aganaha, "Chinga doltangoni ma'brangjok, knalona sengna sikachim, Chinga iano waltuna man'pagenma?"

"Oe, chongmot, da'on mi ding'a ding'a cha'na man'gen," ine ua mechikma aganaha. Germanrang nokningchini pa'ang pa'ang simila biba balbako gingsikman'e ka'dingsmittokaha. "Indiba chingo sokgipa sakgittamba donga," ine ua mechikma aganaha. "Uamangko na'song ripengrang ine channa man'janaba donga. Da'al Kristmas Eve ong'a, iano gogrikani ong'jachina."

"Nokningoa sawa donga? Americanrangma?" ine ua dilgipa sing'aha.

Ua mechikma sakantichikon nie indine aganaha, "Nibo, na'song gimikan angni depanterang ong'na man'gen; uandake ia nokningo dongenggiparangba. Saksa pante bisa guli nangako man'e sinasienga. Bini ripeng sakgniara brangbagimin, na'song gitan okkria enia namen

neng'gokjok. Ia walsamangmangde, ia Kristmas walode gogrik-su'grikako gualtokna mo, hai."

Ua dilgipa (corporal) ua mechikmachiko nitatchaaha. Unon ua mechikma jakpatangko doke indine aganaha, "Chu'ongbejok, na'songni silchidarerangko ua doge ning'chi, am'bol ja'bak kosako gate dontokbo." Bini ge'eta gitan sipai sakbriba an'tangtangni silchidarerangko am'bol ja'bak kosako gate dontokaha : pistol ponggni, carbine ponggittam, ritchenggipa machine gun pongsa enia bazooka ponggni. Un ja'man tapan ua mechikma Jimna French kusikchi aganon American sipai sakgniba silchidaretangtangko ua mechikmana on'attokaha.

Da'o German enia Americanrang ua kuturi chonbeao be'en nanggitotgrike chadengtokon ua mechikma sakantinan ka'dingjimjime sakantikona asongattokna biap am'aha. Chokkia ge'gittamsan, indiba an'tangni palang dal'beaon da'o re'bagital German sakgniko American sakgni Jim enia Robin baksa asongataha.

Harryni ma'amako knaon Germanrangoni saksa an'tang miksilchiko gane ua Americanni mata pariko name niaha. "Na'ara daktorni dolma?" ine ua German mechikma sing'aha. "Ong'ja ong'ade, indiba adita jarang re'angaha anga sam enia sanabanani skiera'aha. Unon ua Americanrangna Englishchi indine aganaha, "Ua an'chi agre jokani giminsa bilgribeenga. Nama cha'ani enia neng'takanikosana nangaia."

Da'o pilakan tomtom asongtokjok. Pilakan damberara. German sakgnigipara bilsa chi'dokni. Bisongni dilgipara bilsa kolgrikgittamsan, uan bribatgipa. Ua an'tang dokraoniko chu botolsako ra'ongkataha; saksara ruti dotsako ra'ongkataha. Ua mechikma ua rutiko rate, sakantina sualahana, chukoba sakantinan rue, suale, "Ia botol tongsa donggipakode ua mata-bua man'gipa pantena" ine donaha.

Unon ua mechikma an'tangan cha'na ringna skang Babrao indine biaha, "Gitel Jisu, da'o chingni sokgipa ong'e dongpabo." Indine bi'on bini mikgrono mikchian gapaha. Enia ia dakgrike, nom'boke, brange, bobilrara gronggrike, biap damsano damsan apsan asongrime dongenggipa sipairang, mitam Americaoni, mitam Germanyoni, pilakan damberara, pilakan noktangtangoni chel'aorara, pilakan mikchi ong'tokaha.

Enia waljatchi ong'na skang ua mechikma jang'kepango ge'gipa Bethlehem bibal (Star of Bethlehem)-ni balako uamang pilakkon apsan chadengdriate niataha.

Ua German mechikma nambata cha'a ringaniko ua mata-bua

man'gipa Harryna on'aha. Seng'nachibaraan ua bilakbakalaha. Pring seng'jok. Kristmas Sal. Ua mechikma okchi ka'chi nange'gipa ringaniko do'chiming chuming enia chiniming on'aha. Unikoa Harryko ripeangna man'na gita chang (table) andapgipa ritchagipa ba'rako ra'e bol dotgnio ripechakaniko tariataha. Unon German dilgipa (corporal) Americanrangna Jimni jako donggipa mapko nie, "Ia chiring joljol re'angbo, unon na'songni dolko man'egen," ine rama mesoke aganataha.

Da'o German mechikma uamang pilaknan silchidarerangko on'atpilo ke indine aganaha, "Bisarang simsakbo. Salsao na'song gimikkon noktangtangona sokangpiltokchina anga sika. Babra na'songna pattichina. Unon German enia American sipairang jako rim'e salam ka'grike, doltangtangchi janggil ditgrike re'angaha.



### Serikkot Ming 32:

#### TURANI ME'APA SAKGNI MATCHA TIMA.

Ching Turaode saksara Mauzadar saksara Peskar. Walsao Cherangre songni mande saksani matchu bisako matcha chike cha'aha. Uamang sakgnian chike cha'spa matchu bisako tingka date, katate, chikram biap sambao donggipa bol pangsa dal'ao machang rike matchana timaha. Sakgnian slai dongarara, sakgnian slaitangtangko ra'e attam salniango an'tangtangni tarigimin machango damsanan asonge timaha.

Da'o sal dapjrip napjok; pilakchin sikdikdik dakjok; simbrimsimbran andalsikangrorojok. Iamang sakgniba slaitangtangko ka'baktangtango rim'kope, katate dongipa matchani adalchiko mikjapgija nie, ku'rang ku'saba agangija jripjrip dongjok. Da'o bachiniba niksosrapgijan brimbitek, kaltapprupru dakgipa bimang bangbanggipa biapo chong'rongrong asongako sakgnian nikatjok. "Jaknokgipa re'bajok," kumisichi Mauzadar aganaha. "Oe, da'a jikjak; al cha'mitingchachaosa gona, sengari dong," ine Peskar aganaha.

Ua kaltapprupru dakgipa, chong'rongrong asonggipa bimangba katate dongipa adalchiko adita ruuten nie, asongchae dongaha. Ja'mankitiko ua al katate donaona re'bae tujole cha'eaha. Janggi apnanga tiktako Mauzadar nisan ka'e goatjok. Goa man'gipa kaltappruprugipa je biapo tujole cha'a, ua biapon ku'saba chrika mikoaba gri, il'engsiksakaba gri tue dongajok.

Dikdiksani ja'mano Peskar aganaha "Nangjakonde, chrika mikoaba, il'engsiksakaba grike ! Uan uan dol'rotrot dongaiake ! Ra, go'olchi gojikateni." Go'olchi gojikate nioba mamingba il'engjaana uamang sakgnian boloni ong'onbaaha.

Da'o bol ja'pango, sakgnian buring re'ronggimal, guli nanggimin matchade namja ine uie, saksu LG kartosko sike, pae pe'e, jako slai kimkim rim'e, gisik seng'e, saksara bilcham natime, sakgnian ka'sne simsakbee ua biapchi re'angaha. Slaichi jotdike nie, ua jaknokgipara sichongmotjok ine nikaha. "Salni ajrakode da'alde ka'napen man'jok, mo. Jedakemangba komsekom gong kolgrikbongakode bigilni damkode altuaen man'aignok, Katchario Boro Sahebo dakkil ka'jokode," ine Mauzadar aganaha. "Uchide Boro Sahebkode, jedakeba gong kolatchikode on'pachina jetenignok. Wa'danang, Cherangre jol kakketoniko wak, do'o, do'bok bon'e chiktokgipa ian ine agane, rope on'gnok," ine Peskarba aganaha. Uamang kusi ong'an gape noktangtangchi re'baha.

Salgipino pring salchugragrao uamang an'tangtangni gogipako wa'pongo bangabangsi kae, rasonggragra Roman Catholic Sorok gita Wa'danangona Peskarni sa'raona ripebamingto saksu mande ramao gronge bisongo indine sing'aha, "Mainasa achak sigiminkoa ripeangengasai?" Mauzadar aganchakaha, "Bao achak, achak gita nikama ? Matchasako ! Bimang gimik toka seakoba nipaengbo na'ara ! Basakoba achakara tingku chengchee, kaltapproe bimang tokama ?" "Ku'sikko, ki'meko, bimangko nioara achak gita dakanasa aganaia angade," ine ua mande nipiljoljole agane re'angaha. "Matcharangni gisepo waknal, do'nalgipa matchade achak gita bimang chonako," ine Peskarba aganataha.

Peskarni sa'rao uko oneon, songni manderang gimikan matcha nina re'batokaha. Bisarang matchako chadengdule nitokaha. Chadengdule nigipa bisarangoni saoba saksu indine aganaha, "Ia matchade Mikchrotpani achak Beldom gita gandamanda daka, mo." "Oe," saksaba, "Beldom gita daka," saksaba, "Beldom gita daka" ine bisarangni agangrikako knae, Mauzadar indine rang'rangataha, "Matchama matchapako Mikchrotpani achak achak ingipa na'song bisaranga mai mikgronchi nie aganenga wai?" "Basakoba nokni achakara chel'ma bakma buringchi re'ange adalko cha'eama?" ine Peskarba inataha.

Dikdiksani gisepon Mikchrotpaba matcha man'a inako knae re'bpajok. Ua achaktangko bakan uie indine inaha, "Aia, na'songde angni Beldomkode dakbebealjokke ! Maina ang'achakko indake goasai? Indake goasaanba mejal attamo mi cha'na nokona re'bajajok, danang,



angni Beldoma !" Iako knaon Peskar, katchario salsal bichal ka'ao dongrongkimal, groode sakki gride mamingba ong'ja ine pangnan a'ikimal, indine aganataha, "Nang'ni achak ong'a ine mai sakki ?"

Unon Mikchrotpa bisao achakska chikani nachil ja'dano donggipa pari namprigiminko mesoke aganaha, "Na'a sakki am'ode, iake, ia nachil ja'dano, sikango bisamitingo achakska chikani pari namprigimin." Peskar jripjrip mamingkoba agan bo'olgija dongaijok.

☆☆☆☆☆☆☆☆

### Serikkot Ming 33:

#### **AIAO-INMANPILE ONG'TINGGRIKA.**

A'gilsako badiaba mandena basakoba a'sel ong'anirangara saoba badiaba mande saksanaba ua apsan a'sel ong'anirang ong'tingsoktinggrikea. Indakgiparangoni mingsa United States of Americani Duramong sakgni Abraham Lincoln enia John F. Kennedy, ia sakgnina a'sel ong'anirang apsan apsan ong'anga. Da'o nibo:

1. Abraham Lincoln 1860 bilsio Duramong songako man'aha. John F. Kennedy 1960 bilsio Duramong songako man'aha.

2. Lincoln enia Kennedy, ia sakgnini bimingrango oikor mingsnisni dongtoka. Da'o nibo:-

Lincoln	—	7
Kennedy	—	7

3. Iamang sakgnini bisarangan asongni Duramong ong'mitingo Duramongni dongram nok White House-o dongmiting siangaha.

4. Lincoln enia Kennedy sakgnian Sukrobar salo goako man'aha. Sakgnikon janggilchipakchini goaha. Ia Duramong sakgniko gomitingo jiktangtang dongchapa. Lincolnko niramo (theatre) dongge ponggni goe ja'mano jamdamo (warehouse) timsoc goe niram (theatre) ona katnapskaaha.

5. Lincolnni Jakrikrako (secretary) Kennedy minga. Kennedyni Jakrikrako Lincoln mingskaa. Lincolnko bini Jakrikra niramchina re'na beng'achim. Kennedyni Jakrikra Dallaschi re'na biko beng'achim.

6. Lincolnni ja'mano Andrew Johnson Duramong ong'rikaha. Kennedyni ja'mano Lyndon Johnson Duramong ong'riksaaha. Sakprakni bimingni banan okkor ming 13 prak donga. Da'o nibo :-

Andrew Johnson	—	13
Lyndon Johnson	—	13

7. Abraham Lincoln John Wilkie Booth goaha. Kennedyko Lee Harvey Oswald goaha. Ua gogipa mande sakgnini bimingrangni oikorrangko chanon oikor ming 15 prak donga. Da'o nibo:-

John Wilkie Booth — 15

Lee Harvey Oswald — 15

8. Abraham Lincoln enia John F. Kennedyko gogipa marang gagimin mande sakgnian bichal ka'ako man'na skangan sakgipin mandechi goako man'e siaha.

9. A'gilsako mingsinggipa manderangni gisepo, Jisu Kristoko Sukrobaro so'otaha; Mahatma Gandhiko Sukrobaro goaha; Abraham Lincoln Sukrobaro goaha; John F. Kennedyko Sukrobaro goaha.



### Serikkot Ming 34:

#### **MATGITCHAKA MAINA DA'ONA KINGKING HOPENGA ?**

*Angangipa : Shebilla B. Marak*

Gaerima Gaeripa Noroa Manda a'ko dange cha'achim, nokko rike dongachim. A'gilsako roani din changra bon'oa, chikosako kal'ani bilsu kari chon'oa, More a'songna ja'rena nangjok, Mode Chigana ja'sokna nangjok. Indakeming Gaeripade More A'songona ja'reangjok, Mode Chigaona ja'sokangjok.


Gaerimade, kawatangni More A'songona napeoa, Mode Chigaona re'angoa, a'gilsako brangari dongrikjok, chigilboo jajaari rorikjok. Segipako mangonaona mangsinaona, Gaerimade kawatangna grape, dongatangna ka'pake, na'tik gol'o jotna ine, chekke pal'tak ra'e, koksi terak kee, rong'ma jingjetna, kasi gajepna ine ma'ningsa chibimachi re'angjok. Chibimaona sokeon, Gaerimade degipako a'gao done, chibimao kasi ga'jep ga'jepe na'tik kitenga, rong'm jingjet jingjete na'bat rim'engachim.

Gaerimani indake na'tik kitmitingo, na'bat rim'mittingo Gaeripade More A'songchini, Mode Chigachini jikko kimpilna, deo dongpilna ine, grit ripee, terik dingdee re'bapiljok. Degipara pagipani re'bapilako niksoeming, ma'gipako rong'ma jingjetaoniko, kasi ga'jepaoniko okamatjok. Indiba ma'gipade bebera'jae, kitakon kitenga, rim'akon rim'engachim. Indake re'bajaana Gaeripade grit ripeako, terik dingdeako

degipana donange re'angpiljok. Bisa pagipani te'rik ra'baako, grit donangako ra'emang ma'gipana mesokejok. Unosa ma'gipara kawatangna rikbajok, dongatangna chabajok. Indiba Gaerima indake rikbaoba, segipa Gaeripani me'mang ja'angchanako malbadeangakosa nikrikaijok. Grap grape re'bapilchina mol'molrikoba, Gaeripade re'bapiljajok. "Jawa chatchiko kimakkimaibo, gipin mandeko kawa kaebo," ine agane Gaeripade unon a'kim sotangjok. "Na'a re'angpilaibojok, an'ching da'ontal kawakana, jikse ong'na man'jawajok. Nang'ni re'angpilo awa cholramao, awa choldualo anti ata gnan, nogor pala gnan, uko tangoba ambinoba chadengdikange nidorekangnabe, nikirekangnabe," ine Gaerimana agane Gaeripade More A'songchi ja'reangjok, Mode Chigachi ja'sokangjok.

Gaerimade kawatangna sinti-do'pilgimari, dongatangna nini-bambanengari, re'bapilaijok. Choldualona sokeon, cholramaona naeon, Gaerimade chadengdike, "Maimaikosa, ang'kawa gitchama, ang'donga ja'panga, awa cholgugao anti ata pala gnan, awa cholramao nogor pala gnan, uko nidorekangnambe, nikirekangnambe ine beng'ata bia," ine dongdike nidorekoa, nikirekoa, chirori bitesa ga'akdapjok. Una to'tro ong'e chabrangoa, Gaerimade makgitchak pil'angjok.

Untalsa da'alona kingking makgitchaka chirori biteko cha'engana enia indake cha'mitingo chirori bite ga'akdapon, skango Gaerima ong'e to'tro ong'a gitan, da'oba to'tro ong'e, "Ha ! Ha! Hop! Hop!" ine to'tro ong'o ong'o hopenga ine A'chikrang agana.



### Serikkot Ming 35:

#### **APING PALSRUKGIPA.**

*Chinonggipa : Grinchi C. Marak, Tura.*

Chin a'songni badiaba songo nitobegipa pante saksa dongachim. Ua panteara bimang chong'rengreng dake daknangachim. Ma'apa detangni mangchikkime, be'en bimang an'senge dal'oroengako nike namen kusi ong'beaha. Chonmitingo uko Cheng minge roachim; unia dal'ahaoba indinen mingjolaiaha.

Cheng ja'del-bolchahaoa, a'gilsakni namkala gadango janggi tangpana sike an'tangni rasong mikkim am'pana Singapore songjinmaona re'baha. Ua uano bosturangni kosako kajina gilgipa dolo, chongmotan,

gipin a'songoniko ra'bagipa enia ra'anggipa bosturangko niroke kajina ra'giparangni dolo napaha. Indiba ua uano bilsignina kam ka'ahaoba antangni chubatgipa kamka'rimskagiparangni maning namnikbatteani kamko mesokna man'jaha.

Singapore songjinmaona bang'a ra'srukgipa manderang ramram songrechongmotgipa gita togie songjinmao palna beng'gipa bosturangko sriksrik ra'barongachim. Cheng uamangni pilak togiani cholrangko enia chalaki dake ra'baarangko tale uioba maibakae rasong bon'chongdika gitan uamangni ra'bagipa bosturangani mingsakoba rim'na man'pakujachim. Chong'motko aganode, Cheng antangko namedake cholie nikbrekujachim.

An'tang baksa ka'rimskagiparangni bang'a dintang dintang songregiparangni topplarangoniko enia uamangni cholajepरणoniko ra'srukbagimin bosturangko ra'bae mesokon, Chengde gisiktangko kaonangesa nipana nangaiaha. Maibakae Chengni nigimin bosturangde rim'na nanggipa bosturangan ong jachim. Uni gimin Chengde antangkosa ka'onangrongachim.

Unsaloba ua duk ong'rongbewalgipa gita ka'tong ka'beesa opischi re'angaha. Thailand a'songoni ringnokma bolsa sokbataiaha. Haida uano bang'a ramram palna on'gijagipa bosturangan gapengnaba donga. Songregiparangko enia uamangni malrangko nina gita ringnokmako dondikataha. Bosturangko sandie am'rikkitania namen man'dikbeani enia nengnikani ong'achim. Kakki ba'rako gangipa dalgipa kamka'giparang enia niroktimgiparang beng'gimin bosturangko am'na topplarangko bilrurue nitokbeengachim. Da'obatai, rasong grie Chengni basegimin bosturangde ra'napna kragiparangsang ong'aiachim. Uni gimin ua toppla nokgiparangkosa ka'onangaiaha.

Kontagnimangon bosturangko niani matchotaha; uni ja'mano pilak songregiparangko re'angchina watattokaha. Songregipa rangoniko ra'rikgimin kajina ra'na kragipa bosturangko tebilo anjalprake donaha. Cheng sigaretko ringe noksiko chadengengachim. Ua antang baksa dal'kalgipa kamka'rimskagiparangni biko nitatako gisiktango indake chanchisoengachim, "Nangni rim'gimin bosturang iano dongpama? Nangko ianoniko bakkaban apjitatna nanggnok. Anga ia kamko ka'na nangjasrang;" ine Cheng chang ritchasa chanchiaha. Uni indake chanchimitingo, rangsan bachikoba Chinese me'chik saksako nikataha. Muni piao nanga gita, ua biko name gisiknange nitataha. Ua mechik Thailand a'songoni re'bagipa ringnokmao songregipa saksang ong'achim.

Bol salakkimo an'tang topplaranko chimonge ua sanaba sengsoengachim. Ua janggiltango bisa bakgitchakko ketket ba'kapengachim.

"Lo Tsen" ine ua gisiktango chanchiaha. Oe, uan Lo Tsen ong'chongmotachim. Bilsibrina skang, Bangkok-o bini mamatangni bolratani karkanao skotong (manager) dake kamka'ani salrangko chanchiataha. Unomiting salrangko ua Lo Tsenko gronge ka'sagrikaha. Lo Tsenba unomiting manderangna dakmesokram noko chroktimgipa ong'engachim. Uko "Do'rimit" ine ba ua jolo donggipa manderang mingrongachim Songjinmani manderang uni chrokako nina tom'chimmongrongachim.

Da'o Cheng aro bia maikai ka'sagrikgipa chamesa ong'achim enia maikai an'tangni tangkarang bio napaha, ia pilakkon gisikra'attokaha. Da'o ua apsan mechikan Singaporeo dongengachim. Cheng uchina ka'sne enia simsakbee re'angaha. Kakki chola ba'rako gangipa mandeni an'tangchina re'baengako niksoe, ua mechikde kena nape, sambengchina jite kataha.

"Ichiko nibo," ine Cheng rake aganaha. Ua bichipakna an'pilaha, indiba bini mikkangko nina kene janggilditpilitaiaha.

"Na'a sana sengenga?" ine Cheng sing'aha. Una mamingkoba aganchakgija kate jokna jotton ka'enga ine nikon, Cheng uko dondikataha. Ua rang'san Chengchiko nimrakataha.

"Oe, uan Lo Tsen, indiba ua angko uipiljaha gita nika," ine Cheng an'tangna aganaha.

"Bisade badita bilsu ong'jok?"

Ia Chengni sing'anina bini mikkang rongdimmelangaha. "Bisako ninaching," ine aganmike bichina sepangchapchaporoangaha.

Ua chapchape re'ange bisako dangtape niaha. Uade suri gita chikokachim." "O, iara mai?" ine bini sing'srapkujaon, ua bisako ongale kataha.

Cheng gonggonge bisako koldoaha. Uade sigiminsachim. Namedake nioa, bisani okko kildingchi kohepako nikaha. Ua kogimin kildingko tete oprake niaha. Ba'ra rongtalao kadepgimin aping ba ganjakosa ua bisani oko nikaha.

Uni indake apingko rim'na man'ahani gimin Cheng kamo doatako man'aha. Lo Tsende bilsu chikkingna pattoko donatako man'aha. Indiba

Cheng pattok nokchi re'ange Lo Tsenko grongcaha, enia bina mittelpilani kattarangko aganna gualjaha.

### Serikkot Ming 36:

#### CHIN A'SONGNI DAL'BEGIPA GUARE

Mandeni chanchie, biltingting jaktingtingchi dakgiminrangoni dal'batsranggipara Chin A'songni Dal'begipa Guarean ong'a. Jajongo gadoe agilsakko nionatode, a'gilsako mandeni dakgiminrangoni mikgrontingtingchi nikna man'gnigipade ia guarekosanmangmang nikatna man'naba donga ine sal, ja enia askirangni gimin uigipa manderang agana. Ua guareko rutaie uni ita aro ro'ongrangko a'gilsakni jatchio (equator-o) a'a kosako dandulangode, foot chet chue aro foot gittam ritchae a'gilsakko wensoke guareko dakna man'genchim ina. 1790 bilsio saksas gisika'ningbitgipa indine aganaha, "England, Scotland, Ireland enia Wales ia a'song dambrini nokrango badita ita aro ro'ongrang dongachim, uarang gimikna bateba ua guareo ita aro ro'ongrang bang'bata." United States of Americani Duramong Ulysses S. Grant minggipa an'tang nok-jam rikarangni gimin, relrama, dolong kaarangni gimin, dongge chikol kitarangni gimin uibegipa ong'e, ua guareko rikao badita a'sel gam bon'ahachim, ua gimikan United States of America a'songo badita relramarang donga, badita chi donggerang donga enia badita ramarang donga ua gimikkon enia songjinmarangni bang'batakon rikna chu'onggnokchim ine ua hisap ka'e aganaha.

Sagal rikamoni rikdoara Tibet a'songko nikgama biapona soka. Guare bon'chotaoni bon'chotaona tongtong toode mel 1145 ong'genchim; guare rikkako ja'rike toode mel 2400 ong'a.

Duramong Chin Shi-huang, bilsio chi'gittamon singhasono asonge Kristona skang 246 bilsion Shansi a'songo sasonka'aha. Ua ia dalbegipa guareko dakna gisiko chanchichengaha. Pagipade raja, indiba ma'gipade re'reroe chrokmesae cha'gipa ong'achim. chin rajani ma'kring mingsinggipa ma'kring ong'achim. Ia ma'kring bilsio 800-na kingking baeaha. Ia bilsio 800-ni gisepo Chin a'songo mingsinggipa chanchirakgipa mande sakgittam Confucius, Mencius enia Lao Tze minggiparang ong'kataha. Ia chasongni ja'mano chin a'song bildingbildang ong'e, dingtang dingtang bang'bea a'kingrangni nokmarang saksas sakgipin baksas

dakgrike salasiengachim. Chin raja ong'on ia nangrimgijagipa a'kingrangko apsan nangdimata a'king damsan dakaha. Bilsi snini gisepon, changgipa sappiparangni dakchakachi, senggipa montrirangni dilachi Chin Raja a'kingtangni samtangtango donggipa pilak gipin a'kingrangko bamattokaha.

Da'oni Chin a'songni salgro ari bon'chotaoni Yangtse chibimaona enia Sagal Rimitoni (Yellow Sea) saliramo donggipa da'oni Szechwan-ona manderang una bamtokaha.

An'tang bobil gitcamrangko an'tangni kosako chakatna man'jana gita, man'echabatgipa enia kenbatnigipa bobil sak 120,000-ko ua an'tang skotong songjinma Hsien-Yang-ona rimangtokaha. Uano uamang katate dongimin amenpadrang gita maningba dingchakgiparang gri, ka'dongagri dongtokaha. Uamangni watbagimin nokrang tiktak gita chachan uamang sakantinan, Duramong Chin nokrangko rike on'aha. Mel 200-ni biapo Matma Ja'kol Aski jin'jok gita gappile nokrangko rikaha.

Duramong Chin an'tangan aganna man'pilgija ka'dongagri dongaha. Bini dongram nokko mande sak lak 50 rikaha, enia ua noko hajalni hajal mitapni mitap dringrang channa ampilgija dongachim; moonggipa dringan mande sak 10,000 chakpakachim. An'tang a'king gimikni nambatgipa, nitobatgipa mechikrangko seoke sakprakna ma'ate kuturiprako jik rakkiachim. Ia rajani indake chimonggimin jikrang inditan bang'a, ua attamprak sakprak rorimna bilsi 36 nangachim ina. Ua walantin an'tang janggiko bobil so'otna kene, dintang dintang kuturio tuachim ina.

A'kingtangko mangrakatani ja'mano, mikkatchi nike agangipa mande saksa rikgimin a'kingko "HU" ingipa gimaatgen ine una aganaha. "HU"-ni ortoara ka'namgijagipa, skiaman'gijagipa. Ian Salgrojolo donggipa ka'namgijagipa manderang a'a game cha'gipa, songdonga'chagipa Chin manderangko bilsi 500-na kingking dekdo on'aha. Uamangni rang'gitik songgaganiranga inditan kenbegni ong'a, uamangni daka a'selranga indine aganme'apani ong'pila, "Salgipengni matchana kennabe, indiba salgroninade do'pinchepnan kenbo."

Salgroo donggipa manderang ta'raggipa gurerango gakate rang'gitik ra'sekgiparang ong'achim. Uamangko bamatsrangna mamingba ka'dongani dongjachim. Uamangko champengna nambatsranggipa cholde a'song gimikko mandeni maldona man'gija ba gureo gakate re'dulna amchakgijagipa dal'begipa guareko dakanian nambatgipa chol ong'a ine nikaha. Ia mangsonganiko chu'sokatna a'song gimikonikon kamka'na

bilakwa'sagipa mande sakantiko seokaha. Pangna bilsu bobilni jakni kamrangko ka'pagijagipa bida man'giprangko ro'ong cho'okataha. Mande so'otgiparangko, chaugiparangko enia patoko donggipa gipin gipin manderangkoba uano kam ka'ataha. Ua guarean a'songginikni patok nokba ong'aha. Hajalni hajal ka'namgijagipa kam nitimgiparang kam ka'giparangko betsmitchi doke doke kam ka'ataha. Jechakgipa manderangko ua guare rikgipa a'damonan salkrongange guare ning'on gittang dape rikdapdapangaeachim. Kam ka'gipani manggisirangkoba ua guareon dapchap-gopchape rikjoljolangaeahachim. Ia guarean a'gilsako bakrobatgipa gopramba ong'achim.

Sagal rikam Shanhaikwan biaponi ua guareko a'bachengaha. Kam ka'china salkrongako man'bagiparang uanoni foot 25 eng'tanggrike ro'ong gate, gisepgriko ro'ong dalgap enia itarangko namedake ane foot 20 chue gatdoaha, enia jatchio gisepgriko a'gataha. Unon guare kosako samtangtangchi foot 5 chue dingtangmancha nitimsochina protchonge gatdoaha. Ding'ol gramchi poksue, neng'a heha hehae, kamka'giparang kitte kitte guareko gatangaha. Mel 300 na kingkingde ja'pa ga'chakna a'a apsanko bang'a antirangna man'jachim. Jrimgipa rong'plengrangko uamang a'dare ruangruangko kam nirokgiparangni betsmitchi dokanin janggal an'chi rerarera ong'e saldoaha. Okgape cha'na man'jae, kanchasrumangmang ganmangmange, bang'an sac siaha. Cha'aniko enia ba'rarangko ra'e ma'drangrangni mande watatgiparang guareona sokangrongbrejaba. Indake miko ra'anggiparangoni sak ritchagniprakoni saksasan guareona sokangna man'aiaha ine saksu itihis segipa agana. Kam ka'enggipa setangtangna mairongpile, ka'tong ma'am sikkime, jajrenge maikai jikdrangrang cha'anirangko magna magna sokangna man'gija tinangkinnamaijok, ganding chindingrangko ra'angkinnamaijok, uko Chin mechikrang da'alonaba mingie sintie ring'kuenga.

Pilak a'sel rim'anirangon, dingchika gama, ma'chika jakma ong'na nangchongmota ine kam nirokgiparang namedake ma'chike ka'dilaha. Bapbema salbaramram silang dare gita dakangoba, do'reng bawanggiram a'kuang waang gita rikangoba, a'bachengaoni name dake tarie rikbaenga gita, namedake rajani dongram nokko rikna taria gita ro'ongrangko namedake sol'e rikaha. Da'ororo ua guareko rikode uko nambate rikna man'jawaha ine da'ororoni uigipa manderang agana.

Pekingni saliramchipak guareode rikgiparang dal'dalbegipa boltongrangko dangroe, boltong gisepgriko stapgipa asterangko gatdoe rikachim. A'ste rikagiparang niksok-nisokgija wewawewa riting riting,



kokting koknignio a'steranko bangabangsi dake wa'pongchangchi ripee chotchanggija rikgaachim; urangko gatsogiparangba chotchanggija a'kete gatsoachim. A'damsako matchoton boltongrangko rue a'dam gipin gipino dongro dongroe rikangaha.

Matchotgimin guare a'damprakprakni ki'sango bang'bea sipai dolprakko Sanggra Mang Tiem guare rikanirangko nirok-nitimchina donkamaha. Indake melprakprakni biapon sipai dolprakko donachim. Indake dongimin sipai dolrang mel gisepgriko re'jojoe nirokna nangachim. Guare kosako protchong protchonge rikgipa biap damprakon sipairang chri-bra ra'bite bobilko nisoachim. Mikritchabripako saksa sipaiko, enia melprakna sipai sakskuko nitimchina donachim. Bolbil nichaksoe dongtimani gisepoba ua guareo nitime donggipa sipairang pangnan been ranta ka'rongachim, enia an'tangtangna on'gimin a'arangko gama-suachim. Duramong Chin-ni bilsa a'nasoksokna rakkikangipa sipairang sak 30,00,000 ong'achim.

Indake jasani ja'mano jasa lak ritchani ritcha manderang chotchanggija guareko rikroangaha. A'solsol a'dare gita daksote, koping po'okpile nigitomanpilgipa bri kosakrang gita dakdoe waang waang a'kuangrangko dakone, silang dare bri kamberang gita galdoe, chibimarangko teksote dakangaha. Indake dakange, saporiri ta'rakbee jokenggipa chibima gipokko niondapgipa gakatgadona man'gijagipa foot 200 chugipa silang dare a'kuang waang waango, niono mingmang gamango ia dal'begipa guareko rikara bon'eaha.

Ia guareko rikna badita bilsimancha nangahachim uko uijaha, Duramong Chin indita bang'bea manderangko jakkalahani gimin, enia melni mel rikgimin gipin guarerangko nangdimdimatani gimin ia rikaniko bilsichicheton matchotataha ine saksa itihasegga agana. Duramong Chin-ni ja'man raja ong'rikgiparangsaka uko matchotataha ineba gipinrangde agana.

Kristona skang 210 bilsio Duramong Chin siaha. Tangmitingo badita dal'gipa mande ong'aha, sioba ua dal'gipa ong'e siaha. Ia raja an'tang tangmitingon an'tangna gopramko dal'bee tarie rikaha. Ua gopram nokkoara silgrakchisa dim'tipachim, enia jingjonggimin silgipokchi dulachim. Nokningni nokking pa'dapgiparango salgini askirangko dakachim; enia waserango an'tang a'kingni apalako noksa sale mesokachim. Nokningchi darangba napna man'jana gita an'tangtangari gona man'gipa chri-brarangko pinange donkamachim.

Binbaksa bini bang'bea jikgiterang sichapaha, enia ua gopram nokko maikai rikaha uko darangba uijana gita uko rikgipa manderangko den'e sonchapaha. Ua gopramkoa dal'begipa a'timbo gita nikaiaha, uko a'bri chongipa gitaba nikaiaha.

Mandeni biltingting jaktingtingchi dakgiminrangoni dal'batsranggipa Dal'begipa Guarea namen namgni ong'bejok. Bilsio 1400-na kingking salgroni ka'namgijagipa gureo gakate ra'sekgiparang Chin a'songona re'bae ra'sekna man'jaha. Chi'gittamgipa chasongo, Genghis Khan, Asiao namen ka'namgijabatgipa Mongol raja, Chin a'song gimikko ga'kning garipikaha, indiba pangnana uko amkamjaha. 1644 bilsio Manchurangni nappretbana man'aniara bilsio kolatchi dakgrikani ja'manosa ong'aha. Dal'begipa guareko rikao chasongsani manderangde bonjoljok, indiba chasong Ritchasana a'songko naljoke rakkiaha.

Da'o nikna man'enggipa guareara chu'gimikde Duramong chin-ni rikgipa ong'ajok. Ja'mangipa chasongrango rikdaptaigipasajok. Da'o nikna man'enggipa guareni bakrangara 1380 bilsioni 1640 bilsiona Ming ma'chongni rajarangni rikdaptaigipa, taridaptaigiparangsang ong'a. Mitam bakrangko saliramni balwa chasongni chasongna a'gisini an'chengrangko balpondapani gimin a'dapaha, enia a'bri a'timborang gitasa nikaijok. Indioaba ia dal'begipa guareara mande saksani dal'na sikaniko, enia manderangni aiao inmanpilgipa bimchipani bilrangko chasongna mesokami ong'a. Ia dal'begipa guareara Kristoni atchina skang chasongrango a'gilsakni manderagni dakgimin mingsni aiao inmanpilgiparangoni nungsang ong'a.



### Serikkot Ming 37:

#### NOA-NI RING DONGENGPITI DA'ONABA

A'gilsakni mingsingbatsranggipa ringara NOA-ni ringan ong'a. Noa-ni ring dongengpiti, enia ua badia biapo dongenga ukoba altue nikna man'a ine am'e nigiparang anganronga.

Skanggipa am'gipa, Salgro Carolinani Dr. Smithni dol 1952 bilsio Armeniani Ararat A'brichi ua ringko am'na re'angaha. Bia enia bini ripeng sak bonga ft. 16945 chugipa, surian pindapgipa a'churangoniko ua ringko am'aha. A'bri gimikan surirarasa ong'ani gimin, uko badiaba

biapo surichi pindapani gimin ua ringko nikjaha.

1914 bilsioni 1918 bilsiona Skanggipa A'gilsak gimikni Dakgrikani salrango saksa Russiani rurugol (aeroplane) chalaigipa Vladimir Roskovtsky minggipa Ararat a'brini salgrosaliramni mel 25 chel'ao ua ringko mikgrontangchi nika a'gilsakna parakchongen a'gilsakni manderang aiao inmanaha.

Dingkarini sal rakpettangmitingo taritaigimin rurugol kansako namjokma namkuja uko ripengtangming bile nichina ua Russiani rurugol chal'aienggipako ge'etaha. Foot 1400 chue bildoani ja'mano uamang Ararat a'brichi mikkange bilangaha. Uamang Ararat a'briko changnichang bildulaha. Uamang bilbapilmitingo a'brini salgipeng gita joljol bilonchokjoljolon rang'gitik a'brini rong'brakrangni gisepo ringnoktopmako sikkate dongengako nikaha.

Sepangchapchap bilange nioa gitchambegipa foot 400 mang ro'gipa ringko nikaha. (Sastro A'bachengao agangipa ringara ro'a ft. 450, apala ft. 75, enia chua ft. 45 ong'a). Ua ringo adita rorogipa maljurini krongrangba donga, enia chipakkore satpako chi jotolna man'na gita ring kosakara bom'romachim. Ua ringara chongipa chibolni rikamo nakate dongenga, ringni bakgitammangde chiningon.

Ia nikaniko Roskovtsky aganon manderang bebera'jaha, batesa uko kadingsteke wataha. Ja'mano uamangni sanggra uchina bildilchina Roskovtsky-ko aganaha. Uaban ua ringko nikoara apan kattakon aganaha.

Ua ringko nikanini gimin namedake see Russiani rajana (Czar) watataha. Ua biapchi re'ange namedake niechina raja rang'san dolsa adita sipairango watataha. Watata man'gipa sipairang ua a'briko gadoc ua ringnoktopmako nikaha, enia uko jachipchange ra'aha. Indiba uni ja'mano Russia a'song gimiko rajani enia sorkarini kosako manderangni chakatani ong'on ua jachipchange ra'giminrangkoba gimaataha ba so'e galaha. Sastroo bebera'aniko gimaatna sorkarini kosako chakatgipa Bolsheviki dolrang ua jabimangrangko so'e galaha ine mitamrang agana. Da'o Turkey sorkari je mandeba ua ringnoktopmako Ararat a'brioniko ra'angjachina raken beng'e donaha.

Gnigipa A'gilsakgimik Dal'gipa Dakgrikani salrangoba ia Noani ringni gimin Russiaonin nakattaiaha. Russiani sipai dolni dilgipa Major Jasper Maskeylyn minggipa indine aganaha, "Skanggipa Dal'gipa Dakgrikani salrango saksa Russiani rurugol chalaigipa Ararat a'briko ringnoktopma nikani gimin a'brigimikko namedake bilwenwene am'china

anga angni mande saksako watataha. Arctic surirango gadokimalgiparang suri jrongmitingo ua chiboloniko am'e ringnoktopmako nikaha. Ua ringara namen sochemjok, ft. 400 na baten roa, enia ring bimang gimikko rong'ka gita nikajok."

Da'o bilsio hajalgni batangaha, saksu Babylonni mande Barossus minggipa indine seaha : "Ringnoktopmaoniko a'kakki nongmnikgimin doktorangko ra'ena Ararat a'brichi re'angaha."

Chasongni chasongna ia ringni gimin mamingba gisikra'jaha, indiba Ararat a'brini sepang jolrango donggipa Armenian manderang ua ringnoktopmako gisikra'ronga. Ua ringnoktopma a'brini gisep surio basakoba tongsa nagale, basakobade chu'gimikan suri ning'o dape donga ine ia manderang pangnan bebera'a, enia da'alona kingking bebera'engpiti.

1883 bilsio banggrio Ararat a'bri kosakoni dal'begipa suri tindaksa be'okaha. Unon bang'a a'brirang ko'rakaha. Ararat a'brioni suri jronge chibanpakbaako champengna dolsa manderangko watataha. Gitchambegipa ringni mangege surio nakatgale dongengako uamang nikaha ine aganaha.

A'bri sepang jolo donggipa manderang iako knahaon, uamang an'skitaha. Ua a'brionio ringnoktopma donga ine uamang chasongni chasongna uia, indiba ua biapo mitde donga ine bebera'e ring sepangchi darangba re'ange nijaha.

Ringnoktopma donggipa biapchina re'angchina watatako man'gipa manderang ua ring bewalan namengpiti ine nikaha, indiba mitam bakrang be'aha. Uamang kuturi gittamkosa nape niaha. Gipin dringrangko suri ning'o dapani gimin nina man'jaha.

1893 bilsio Jerusalem enia Babylon mondolini Pamong Dr. Nouri minggipa Euphrates chibimani bisikko nijojoani ja'mano Ararat a'briona sokaha. Bia enia bin baksa re'gipa manderang ua ringnoktopmako nikaha, enia ring gimikkon bon'e nitokaha. Ua indine seaha : "Ringku enia mangegeko namedake nikna man'aha, indiba ring jatchikode suri dapaha. Bol doktorang namen ritchabea gita nika. Ringni bilbangrang gisim enia gitchakprang daka. Ia bilbangrango datgipa gojalrang footprak nagale dongenga."

Ia dal'gipa pamong, a'gilsak gimik songre'e aganprangkiga, Duramong Theodore Roosevelt-ni nangrimbegipa ripeng, enia ku'sik mingchi'gniko namedake aganna sapgipa, a'gilsak gimikna gisiknanggnigipa kattako tol'e agangipa ong'jawa.

1893 bilsio Chicago songjinmao a'gilsak gimikni anti cha'ao ua ringnoktopmako mesokna man'na gita, Belgian manderang uko Ararat a'brioniko am're, uko rue, rabae, riktai mesokna mangsongachim. Uamang ringni dokta ge'antiko namedake bakoso chipe ra'bana mangsongachim. Indiba Turkey Sorkari ua ringko indake gipinchi ra'angna on'jaha. Iani a'sel ua Belgian manderang ua ringko am'ako dontongaha.

Ia re'anggipa a'gilsak gimikni Gnigipa Dal'gipa Dakgrikani salrangoba ia ringnoktopmani gimin jangaha. Australiani rurugol chalaigipa sakgni Ararat a'bri kongkepo donggipa Noani ringko jachipchange ra'ako mesokaha. Ia mande sakgni ua jabimangrangko bachina ra'e kataha da'o mamingba uijaha.



### Serikkot Ming 38:

#### SONGNI NOKPANTE

Songni nokpanteke rikna songni bilsokgimin panterang enia chasingdobaenggipa me'abisa bilsidok ba bilsisni ong'gipa gimikan nokwara'chenga. Nokwara'a krintokmanosa manchigimin salo songni me'aparang enia pante desa gimikan a'songko rakkigipa, manden janggi jamako kimbitgipa Tatra Rabugana, Salgra Susimena, Babra Kalkamena do'o-wak doke, do'bok-matchu den'e, chu cheke, rugalchengsa songni Nokpanteke rikna krong cho'songchenga. Uni ja'manosa rugalgimin do'o-wakko, do'bok-matchuko rae, tete mesal songgipa song'e, chu chekgipa cheke Nokpanteke dondikgija rikanga. Nokpanteke jakchakgija rikenggipa me'aparangna pante desaringan song'gimin mirangko, toe sachigimin be'an bitinrangko namedake brine ruano nonggiminko jaktangtangchi kursiko du'e du'e on'a, chukoba kana.

Nokpante nokko srang miksni ba mikchet chue rika. Mikkangchipako bol dal'ako jatchio jang'ke chana. Jang'keko altuae gadona, ong'onna man'na gita nokking bolgroo redokrako kae dongdee dona. Enia jang'kepeng sambao panterangni mipalrangko donchakena kaldeko dingdee dona. Mikkangchipak tong'sa samtangtangko mamingba bare dim'gija bangbang dona. Tong'sakosan nokgil gimikko man'gope bare dim'a. Nokgilchipakko a'brangna kaldik dake jakkala. Jatchio wa'al so'na gata.

Basikba sal Nokpaneko rike matchotahaon, matchotani attamon Nokpanteo Nokdonggaaniko daka. Nokdonggaon songni kamal

Nokpanteni maljuri tritma ja'pango cha'chat so'ram ro'ong pattalo pattigipa ra'rongipa Babra Kalkamena, Tataa Rabugana cha'chat so'e, mittele-mitchue, songgimikni manderangko pilak a'sel nangaoniko rakipachina, janggitangao pattipachina Janggini Nokgipa Jamani Biambi Dakgipa Rugipao bi'e rugalchenga. Indake rugalani ja'manosa panterang damarang doke, adil-bangsi sike, kakwa-silcha chime, mil'am-seppi ra'e chrokmesaa, grika-torea, inchroa, chu walgimikan ringe chotchanggiija an'senge balsala.

Nokdonggaani jamano songni panterangni Nokpanteo janggitangani a'bachenga. Nokpanteo panterangni janggitangania namen an'sengbea. Uno panterang an'senga raraakosan dakaia. Nokpanteni dal'dalgipa panterang Nokpanteo janggitanganiko name simsakbee sason ka'a. Chonchonkalgipa pante desarang Nokpantena salantian am'bol am'na chi ko'na nanga.

Pring attam songni panterangni mipalrangko abitang nogiparang, chonchongipa pante desarang, basakoba ma'aparangba Nokpanteni kaldeona dinbae ra'bae on'a. Kaldeo donegimin mipalrangko Nokpanteo dongsoenggipa paterang saldo saldoe chimongsoa. Pantegimikni mipalrang sokchimongbaman'tokon, panterang asongdule chana a'bachenga. Mi cha'na sikkang samrangko engprake pante sakantian an'tangni samko sakantinan tike tike on'tiprak sualchenga. Sakantian samtangtangko suala matchotosa cha'na a'bachenga. Indake nokdang dintang dintangni dintang dintang sam song'arang pilaknan mat an'chi pila tika.

Pringo pringni songni me'aparang mipring cha'na skang a'sel gamu rim'na skang, Nokpanteona re'bae, kok, ruan, am sepanirangko enia maiba maiba nokdangni jakkalarirangko watachenga. Enia indinari asongariba me'apa danggnasikkarara maiba maibarangko agangrike sal re'ata. Attamrangoba indaken sal re'ata.

Attamo attamanti Nokpante sa'rao sal namode panterang pangnan kal'grike dakgrike bil susaanirangko dakronga. Bil susaanirangni gisepo wa'pong sigrika; wa'pong salgrika; jakpong de'a; biltingtingchi gitokgrengo jakchi wenkotgrike dakgrika; changkichono rim'kotgrike dakgrika; enia gipin gipinrang bil susaanirang. Dolgnigni kal'grikaniranga sue goani, ja'kol kal'ani iarangko Nokpante sa'ra apalao kal'ronga. Iarangko attam walsimsimaonan kal'ronga. Enikode attam walo Nokpanteoba dama doke, bangsi sike, chrokmesaa. Ianon panterang A'chik ma'bikringni ma'manti ring'anirangko, jekae, ajea, cheraa, doroa, gonda doka, rere kal'a, harara ringa, ahoma ringa, indakgiparangko ring'e

balsalronga.

Songo maibakai buringni matchok, me'sam, wak, balgitchakrangko man'on, Nokpantena dingtangmancha ninge sko tots'a, ja'ping samsa ba jak samsa pangnan chamronga. Indake man'jokon Nokpanteni panterang Nokpanteon jinma jinma sangko dal'gipao song'e katchae an'senge cha'ronga.

Nokpanteon songni nokni melaramba ong'a. Songo maiba maiba jegrik-dakgrikanirang, ingrik-saegrikanirang dongode, songni Nokma, Sordaran songni me'apa mechikmarangko tom'dakate gro jea, bichal ka'a. Songo maiba gro dal'kala ong'ode, uko Laskarsan bichal ka'na nangode, Laskarko rimbac, Nokpanteon biko gro rim'ata, bichalka'ata, rae ratata.

Songgipinni mande agitalrang sokbaode, uamangde Nokpanteosa ma'chakchengeronga. Attamosa songni Nokma uamangko banoni, maina re'ba, uarangko sing'e, sandie mi-chi song'e chane sokachaka. Indiba tua bamani bidingode songgipini pilak re'pak do'pakgipa songregiparangba Nokpanteosa neng'take re'angronga.

Nokpantechi me'chikrangko mikkangchakao jang'ke chandogipa gita gana on'ja. Iako namen raken beng'a. Saoba mechik maibana ia jang'ke gita gaode bikode bichal ka'e dai rara. Tongsa bare dim'gipa ku'pa sambengo dingtang jangke chana gnang. Maiba a'sel nangbeana Nokpantechi gana nangode, ia sam'bengo changipa jangke gitasan mechikrangde gana man'aia.

Songni damarangko pilakkon Nokpanteosa dona. Songo walo maiba maiba a'sel ong'ode Nokpanteo tugipa panterang Nokpanteni damako doke songgimikko de'mesaa.

Songo wanganaliko Nokpanteosa trumao cha'chat so'ramo chachat soe, Pattigipa Ra'rongipana rugalchenga. Uni ja'manosa ua Nokpanteon songni pante me'trarang, meapa mechikmarang damarang doke, adil-bangsi sike, chrokmesaa. Ia Nokpanteo wanalchengesa songni Nokmani nokona dama-rang dokjoljole adil-bangsi sikjoljole, chrokmesajoljole re'anga. Unide songni nokantiona bawene antisana wangala.

A'chik a'songo A'chik ma'bikringni dakbewalo Nokpanteko rikani enia uo janggitangani da'o ka'sne ka'sne gimaroroangengiok. Ia nambegipa dakbewalko tange rakkina A'chik ma'bikring maikoba dakode nangenchim.

